



07187

吳越備史卷三

忠獻王

忠遜

王附

書錄

書錄

忠獻王諱宏佐字元祐文穆王第六子也母曰吳越國仁惠夫人許氏王以天咸三年七月二十六日己巳生于功臣堂初孝獻世子之居監撫也文穆王治其府于城北將俾居之一日孝獻會王以采戲于青史樓遽謂王曰君王方為我營府署今與爾賭之比及四擲而王遂得六赤孝獻失色從容曰五哥入府佐當將符印之命因再拜孝獻竟怒擲骰益於樓下俄而孝獻薨王授兩軍節度副使檢校太傅天福六

吳越備史卷三

一

年秋八月諸將請誅內衙指揮使戴暉暉乃王庶兄宏侑之親暉謀立宏侑故請誅之免宏侑為庶人復姓孫氏更名本罪異志也是月王以遺命承制授兩軍節度使九月庚申王即位于僊居堂赦境內外班賚有差及租稅等丞相曹仲達攝政事是月辛未王遷于思政堂命境內給復一年諸關梁禁制悉從除滅又命田園有隸道宮佛寺比入賦稅者悉免之冬十月長星見十一月金陵來祭我先王是月敕授王起復鎮國大將軍右金吾衛上將軍員外置同正員領鎮海鎮東等軍節度檢校太師兼中書令吳越國王食邑一萬戶實封一千戶仍賜保邦宣化

忠正功臣是歲番禺劉龔殂子宏晟嗣

壬寅七年春正月閩人來祭我先王二月癸卯敕葬先

王於龍山之南原三月敕遣使大中大夫李鶚來歸
先王之賵乙丑中吳建武等軍節度使廣陵郡王王
世父元瓌殂子文奉嗣

元瓌字德輝武肅王第四子也起家奏授沂王府
咨議參軍宣武節度判官累遷散騎常侍賜金紫
尋屬軍旅事乃改授馬軍廳事指揮使天復二年
徐縮叛顧全武請王子之珣溝武肅以淮帥常請
結姻好乃遣元瓌徵贖爲全武僕而去比及望亭

吳越備史卷三

二

有逆旅媼輒識之至潤州安仁義亦知其非常將
以其下十人易之全武懼因賂閭吏中宵而去及
抵邗溝指陳逆順之理淮帥爲之動容歎曰生子
當如錢郎吾之子狇犬耳卽日遣使命頽還軍廣
陵尋逆婦而歸後累征縉雲新定皆有功授邵州
刺史尋征吳興高澧及攻東州復授睦州刺史尋
遷蘇州累敕授中吳建武等軍節度使蘇常潤等
州團練使太傅同中書門下平章事侍中中書令
在郡三十年性儉約而恭靖嫻習弓馬文穆王卽
位以王兄尤加禮遇因元瓌來覲爲酒授瓌曰今

日之事宜兄當之俾予小子至是實兄推戴之力
瓌俯伏曰大王功德高茂先王擇賢立能君臣之
分敢忘忠順因相顧感泣久而益歡尋奏敕封廣
陵郡王封不及授宣命于柩前終年五十六葬以
王禮諡曰宣義

壬申制加王食邑七千戶仍改賜保邦宣化忠正翊
戴功臣夏四月漢主龔殂子玠立六月晉高祖崩少
主重貴卽位秋七月王以內衙指揮使章德安李文
慶爲內衙左右都監使冬十月以都指揮闕燔胡進
思爲內衙左右統軍使十二月己巳以龍山武功堂

吳越備史卷三

三

爲文穆王廟

癸卯八年春正月癸未重建功臣堂二月晉主還京是
月丙辰丞相皮光業卒

光業字文通世爲襄陽人父曰休有盛名爲蘇州
軍事判官太常博士光業生於姑蘇十歲能屬文
及長以其所業謁武肅累署浙西節度推官賜緋
命入貢京師梁後主特賜進士及第仍賜祕書郎
授右補闕內供奉賜金紫貞明中淮人來求好命
光業聘之及還贈錢三百萬復禁其出且曰可以
市易光業曰我使介也豈買豎也乃委置而去淮

人亟載隨之梁主選武肅子傳珍爲駙馬都尉命
光業如京師及回至靖海光業舅氏滕文規爲山
陰令日暝遽見黃衣吏報曰皮補闕今日已及靖
海文規詰之遂失所在尋兼兩浙觀察使文穆卽
位命知東府事初光業旅遊會稽有神降于里巷
光業往視之神遂不語及去俛詰之曰皮秀才來
神何不語答曰皮秀才此土地主我小神不當見
之至是果驗國建拜丞相凡教令儀注多其所定
光業美風儀善談論人以爲神仙終年六十七謚

曰貞敬

吳越備史卷三

四

三月唐主昇殂子璟嗣年號保大閩主延政稱帝國
號殷是月漢劉宏熙弑主玠而自立夏四月朔日有
食之秋七月王貶內衙都監使章德安于處州李文
慶于睦州冬十月敕遣使授吳越國王玉册册曰惟
天福八年歲次癸卯十月丙午朔越六日辛亥皇帝
若曰在天成象拱辰分將相之星惟帝念功啟土列
侯王之國朕所以法昊穹而光宅稽典禮以疏封而
況世著大勳時推令器探寶符而嗣位杖金鉞以宣
威羽翼天朝藩籬東夏宜列諸侯之上特隆一字之
封簡自朕心叶于輿論咨爾保邦宣化忠正翊戴功

臣起復鎮國大將軍右金吾衛上將軍員外置同正
員檢校太師兼中書令杭州越州大都督充鎮海鎮
東等軍節度浙江東西等道管內觀察處置兼兩浙
鹽鐵制置發運營田等使上柱國吳越國王食邑一
萬七千戶實封四千戶錢宏佐爲時之瑞命世而生
負經文緯武之才蘊開物成務之志英華發外精義
入神亞夫繼社稷之勳顧榮擅東南之美眷言祖考
志奉國朝清吳越之土疆執桓文之弓矢天資厥德
代有其人荷堂構以克家事梯航而述職殊庸斯在
信史有光是舉彝章爰行盛典土茅符節方推奕世

吳越備史卷三

五

之賢黻冕輅車更重策勳之禮斯爲異數允屬真王
今遣光祿大夫檢校司徒行太子賓客上柱國太原
縣開國男食邑三百戶王玟使副正議大夫行尙書
吏部郎中上柱國賜紫金魚袋趙熙等持節備禮冊
爾爲吳越國王於戲周寵元臣賜履錫命漢崇異姓
裂土封王指河岳以誓功俾子孫而襲爵爾纂服舊
業朕載考前文勿忘必復之言更廣無窮之祚懋昭
前烈爾惟欽哉

十一月辛巳王駕遷于功臣堂是月癸未丞相曹仲

達卒

仲達臨平人也本名宏達避王名更之祖信知嘉興監事累贈司徒本歙州人尋歸杭州爲臨平鎮將入都建時信因保嘉興東界遂家臨平焉父圭浙江西道營田副使檢校太尉圭將生時信夢人謂曰我當爲爾子有二千石信語夢于鄉黨鄉黨不能諭皆賀曰生此必主豐稔圭有膽氣乾寧中淮人圍嘉禾圭與其族人師魯守之賊中有望氣者曰此雖孤城中有貴人不可圖也圭與師魯登樓張樂縱飲矢石交至視之晏如也嘉禾平圭以功授蘇州刺史開平間淮人復圍蘇州屬正月望

吳越備史卷三

六

夜師魯第盛陳燒燈之晏賊之俘執者咸縱之觀圭終蘇州師魯形短而足跛武肅嘗稱之曰今之晏平仲也人遂號爲曹晏嬰竟卒於鎮東軍都押衙仲達初生室有紫光少時圭常節其衣食雖嚴冬尙未挾纊品饈悉與僕隸等又日令運甓圭在姑蘇時與仲達求婚於睦州陳詢及將逆卜之曰陳是親必不就當聘他門由是榮貴旣而遂由國城武肅王見而奇之乃以王妹儷焉累授台處二州刺史文穆卽位居諒闇命仲達權知政事國建拜丞相今王卽位復攝政事時大賚中外諸軍

中有言不均者輒舉仗不受賜諸將不能制仲達
諭之因皆釋仗而致謝仲達性淳厚好施與文穆
尤重之常止呼丞相而不名終年六十二諡曰安
成

是月納元妃仰氏

寧國軍節度使同參相府事詮之女也

甲辰開運元年春正月壬寅丞相林鼎卒

鼎字渙文閩人也父無隱鼎生於明州大隱村初
刺史黃晟頗好禮士無隱依之有詩名嘗爲詩云
雪消二月江湖闊花發千山道路香知言者以爲

吳越備史卷三

七

無隱必有貴子鼎初謁武肅以爲觀察押衙推尋
爲文穆王幕府文穆王以其才行累薦不見用一
日復密薦之武肅王曰我觀林鼎骨法真輔相器
然我不貴者欲汝貴之庶其盡心於汝也文穆襲
國署鎮海軍掌書記節度判官鼎性讜正而強記
能書得歐虞法比及中年夜讀書必達曙所聚圖
書悉由手抄其殘編蠹簡亦手綴之無所厭倦國
建乃掌教令尋拜丞相每政事有不逮者鼎必極
言之天福中建州之役鼎指陳天文人事累疏切
諫及師行果不利著文集行於世終年五十四諡

曰貞獻

三月僞閩王延義爲其下指揮使朱文進所弑而文進自立復修貢於京師是月敕授王起復增食邑三千戶實封一千戶夏四月丙午王親祀五廟秋七月辛未朔晉少主改元開運大赦是月以劉知遠爲行營都統九月朔日有食之南船務石井有物形如守宮尾長七尺許鬣且角獲之置于安溪潭冬十一月王命從兄東府安撫使仁俊爲內外馬步都統軍使弟宏保爲東府安撫使閏十二月閩人殺朱文進尋以僧儼明爲主

儼明姓卓氏雪峯寺僧平素爲衆所重相與迎之遂立爲帝未幾

吳越備史卷三

八

爲其下李仁達所殺而自立歸歛金陵

乙開運二年春三月丙午王從祖順化軍節度使鐸卒

鐸字輔軒太師英顯王之第五子武肅王之少弟也生而有文在其足曰王及長而滅旣生而太師薨武肅育之武肅薨鐸請服通喪性多藝尤精音律承制累授溫明二州刺史檢校太尉奏授恩州防禦使文穆時授兩浙行軍司馬拜命之日儀注特盛尋奏改本州團練使順化軍節度使終年五

十三諡曰忠簡

夏四月晉主還大梁秋七月修武肅王廟于城西奉
旃檀神像而致焉八月朔日有食之是月金陵遣將
王建封克建州虜王延政歸冬十月敕遣太子賓客
羅周岳右庶子王延濟冊王守太尉十一月朔王大
閱于北郊是月誅內都監使杜昭達內衙都指揮使
明州刺史闕璠庶人孫本賜死貶都統使王兄仁俊
本府安置

杜昭達闕璠皆好貨富人程昭悅以金寶交結二
人薦於王昭悅得侍左右愛特踰於舊將璠不能
平昭悅懼謀去璠璠專而愎國人皆惡之王亦惡

吳越備史卷三

九

之於是昭悅出璠爲明州刺史右統軍使胡進思
爲湖州刺史璠謂進思曰出我是棄我也進思曰
老兵得大州幸矣何爲不行乃各受命旣而復以
他故留進思統軍使王兄仁俊母杜昭達之姑也
昭悅因譖璠昭達謀奉仁俊作亂下獄鍛鍊成之
誅昭達與璠幽仁俊于東府昭悅收仁俊故吏愼
濫其使證仁俊之罪拷掠備至濫其堅守不屈王
嘉之擢爲國官

丙午三年春二月朔日有食之三月敕授王東南面兵
馬都元帥增食邑二千戶實封五百戶仍改賜推誠

匡運忠亮威德功臣秋七月庚寅吳越國夫人許氏
薨

夫人丹邱人也諱新月善音律文穆王後庭樂部
皆命掌之初鄜氏生孝獻世子後庭咸尊敬有尼
契雲掌香火于麗春院之佛堂頗有知人之鑒視
夫人曰彼鄜氏者遠不能及至是果如其言王襲
位敕封吳越國夫人薨年四十四敕諡曰仁惠
八月重建天寵堂是月壬申葬仁惠夫人于國城西
山之原冬十月金陵攻福州節度使李宏義遣將徐
仁晏李廷諤等求救于王

吳越備史卷三

十

李宏義本名達殺卓儼明而歸款于金陵金陵授
之節鉞仍編入屬籍更名宏義旣而遣僞兵部侍
郎陳覺使于宏義覺還及建州又遣侍衛官顧忠
以金陵僞敕使之入覲宏義以其初不宣命至是
方以書至不從覺乃與監軍使馮延魯自建州興
師皆金陵之志也

是月王命統軍使張筠趙承泰等率水陸兵三萬人
以救無諸

時福州乞師於王王召諸將議行諸將吏皆曰道
路險遠難以師救內衙都監使水邱昭券以爲當

救王曰肩亡齒寒吾爲天下元帥曾不能救隣道
將安用之諸軍但樂飽食安坐耶命水邱昭券掌
軍用兵程昭悅掌應援餽運而以軍謀委元德昭遣
王筠等率師救之時王召左右議鑄鐵錢以益將士
未祿賜弟宏億諫曰鑄鐵錢有八害新錢旣行舊錢
十皆流入隣國一也可用於吾國不可用於他國則
商賈不行百貨不通二也銅禁至嚴民猶盜鑄况
家有鎔釜野有鐔犂犯法必多三也閩人鑄鐵錢
而亂亡不足爲法四也國用幸豐而自示空乏五
也祿賜有常而無故益之以啟無厭之心六也法

吳越備史卷三

七

變而弊不可遽復七也錢者國姓易之不祥八也
王深嘉之乃止是行也宿衛衣錦軍武肅王廟庭
者聞甲馬號令之聲凡數夕而止及接戰於閩淮
大視王師周徧郊野人皆丈餘蓋靈助也

十二月王命弟宏偃爲湖州刺史

丁四年春正月契丹主入東京稱會同十年廢晉少
主爲負義侯遷于契丹黃龍府二月庚午有雉集於
玉華樓辛未晉劉知遠稱帝於河東國號大漢是爲
高祖復稱晉天福十二年己卯王誅內都監使程昭
悅釋東府仁俊罪三月庚寅今大元帥吳越國王出

鎮丹邱戍成王遣將余安率水軍救福州大敗淮師
獲其將都指揮使楊匡業蔡遇等僞東南面行營都
統王建封等走之擒戮裨將孟堅等并餘黨二萬餘
衆器械數十萬李宏義歸附於我更名孺贇

初忠懿王之治閩城壘巒皆有錢文曰此城終歸
錢氏忠懿頗惡之因刻去而錢文愈明又謠曰風
吹楊葉鼓山下不得錢郎戈不罷至是皆驗是行
也歸罪于陳覺馮延魯謂其專命而行也金陵始
以覺爲東南面招討使延魯爲監軍及其敗績反
以專命爲罪以贖恥一何偷哉爲君而偷復歸罪
於下其喪師也不亦宜乎

吳越備史卷三

三

夏四月李孺贇遣弟孺賓來請入覲從之五月我師
凱旋王饗將帥于光册堂賞賚有差是月敕授王諸
道兵馬都元帥增食邑五千戶實封五百戶仍改賜
資忠緯武恭懿翊戴功臣是月楚王希範殂弟希廣
嗣六月乙卯王薨于咸寧院之西堂年二十在位七
年敕諡曰忠獻八月敕葬于龍山之西原王英明果
斷權變不測初嗣位尙少溫柔好禮恭勤政務發摘
姦伏人不敢欺諸校驕恣者能優容之及被譴皆不
知覺兵籍使錢承德家火俯邇內城命親軍援之王

登樓而望有伺便攘竊者亟命斬之衆因悉力火遂滅淮人之攻閩也李孺贇來求援諸將議將不從王因集而詢之果同其說王變色曰脣亡齒寒春秋明義吾爲天下元帥執大兵柄豈不能恤隣難乎諸將躍馬肉食不能爲我身先耶有異議者斬之及大舉遣將誓師辭令明肅衆皆踴躍承命旣而果成大功開運中將益車徒乃下令募軍中及民間子弟而踰時無應者乃命大料之令曰料而得之者糧賜皆蠲半翼日投書者雨集遂加精訓南方之捷多其力也有獻嘉禾者王問倉吏蓄積幾何對曰十年王曰然則軍食足矣可以寬吾民乃命復其境內租稅三年論曰王岐嶷之姿雖由天縱續嗣之日方屬妙年帑藏因匪祿之初將校兢陸梁之志乃能恭勤庶務紹開霸圖有果斷之名無酣嗜之累以至興復宮室開拓土疆光有大功聿修厥德而享祚非永孰不哀哉

吳越備史卷三

三

忠遜王

忠遜王諱宏侖文穆王第七子孝獻世子同母弟也起家內衙指揮使檢校司空開運元年冬十一月出爲東府安撫使累授檢校太尉尋拜丞相開運四年

六月丙寅卽位于天冊堂是月晉主入大梁改號曰漢秋七月閩帥李孺贇來覲是月庚子有雉升于天冊堂之戟門旋歷廊廡久而獲之閏七月王命李孺贇復任無諸王親餞于碧波亭八月葬忠獻王于國城西原冬十月今大元帥吳越國王至自丹邱十二月李孺贇復貳于我王命東南面安撫使鮑修讓等攻討擒而戮之已酉傳首國城是月命丞相吳程知福州威武軍事庚戌內衙統軍使胡進思指揮使諸溫斜滔等以內衙兵遷王于義和後院諸將校率眾迎今大元帥卽位焉自忠獻王時諸將校驕慢雖旋

吳越備史卷三

加誅殛而在位者皆優饒遇之及王纘嗣性既嚴急誅杭越侮法吏三人而統軍使胡進思恃迎立功干預政事王惡之每有僭越必顯責讓進思憂懼不自安屬內衙指揮使何承訓希旨請誅之又謀於都監使水邱昭券昭券以進思黨盛難制請於王且容之王猶豫未決承訓懼反以謀告進思進思遂亂率親兵戎服入見王叱之不退因惶駭入義和院進思鎖其門矯稱王命告中外曰王猝得風疾傳位于俶因帥諸將迎今大元帥於私第且言於丞相元德昭德昭至立於簾下不拜曰俟見新君進思等亟出褰簾

德昭乃拜進思稱王命承制授元帥元帥曰若全吾兄乃敢受命不然當避賢路進思承之元帥始視事於是進思殺水邱昭券進思妻曰他人可殺昭券正人君子也柰何殺之初忠遜王將卽位近侍陳禹嘗夢以金鈔鑼承日輪加王之項而手持二銀未幾墜地旣而以夢語人人曰汝主將有非常之事然其二銀不過二十旬耳及卽位以黃金一鎰命近侍袁文昌鑄巨錢文昌意其求識且懼不就乃宿謀於匠者別鑄一以爲備翼日以所授金鑄之遜王臨視果不就因潛以宿鑄者獻之至是皆驗其兆後廢王薨請

吳越備史卷三

五

諡曰忠遜以王禮葬會稽秦望山之原

論曰王以英敏之行惡強梁之黨納承訓阿順之說昧忠懿韜晦之機僅以寡謀至于失位故知君不密則失臣臣不密則失身誠哉是言也猶賴鵠原之至愛致稽嶺之安居養玉體以終天年掩泉扃而備王禮古之廢君失國未有若斯之安全者其實有忠懿王仁孝之道至焉

吳越備史卷四

大元帥吳越國王

王名俶字文德文穆王第九子也母吳越國恭懿太夫人吳氏王以天成四年歲己丑八月二十五日生于功臣堂天福四年十二月承制授內衙諸軍指揮使檢校司空忠獻王累授王特進檢校太尉開運四年春三月庚寅出鎮丹邱卽台州也下車數月有僧德詔語王曰此地非君爲治之所當歸國城不然將不利矣王從其言卽求歸秋九月甲戌發自丹邱歸覲也是日大風東南有雲如樓閣之狀識者異之冬十二

吳越備史卷四

一

月內衙統軍使胡進思指揮使諸溫釗滔等幽廢王于義和後院乃召諸大校及率中外軍庶奉迎王于南邸晡時王見府僚將校於帥府之外簾謙讓者三諸將校以王素有德望俯伏稱賀卽日王以鎮海鎮東等軍節度檢校太尉兼侍中蒞事于元帥府之南序

戊乾祐元年春正月辛亥朔漢主南郊大赦改元是月乙卯王卽位于天寵堂赦境內租稅班賚有差龍天堂卽忠獻王重建建于廢王不自前年季冬浹于正克遷王乃至是而始臨位焉且陰晦彌月是日雲物澄霽中外人情胥悅王戊遣

將兵奉廢王子衣錦軍丙子漢主髡殂少主承祐卽位二月辛卯王親祀五廟乙未誅內衙指揮使何承訓懲其反覆中外大悅

初廢王將黜胡進思而承訓與其事議未決承訓反告於進思及王卽位復請誅進思王懲其反覆立命斬之

三月敕遣中書舍人張誼來歸忠獻王賄丙寅內衙統軍使胡進思請誅廢王王不許於是進思憂懼而卒

先是王遣都頭薛溫領親兵保衛廢王且戒之曰

吳越備史卷四

二

爾等小心衛護吾兄若有異事當死拒之至是進思請誅不遂乃詐以王命令薛溫害之溫曰僕受命之日不聞此言決不敢妄發也進思乃夜遣二賊踰垣而入欲刺廢王廢王闔戶大呼薛溫聞之率衆而入夜二鼓斃二賊于中庭至是進思聞二賊死憂懼不二日發疽而死

夏四月大閱馬步兵六月朔日有食之冬十一月下令以每歲租賦逋滯者悉蠲之仍歲爲著令百姓歌

舞焉

己酉二年春二月匡武都連名輒舉求職王命斬狀首

二人坐黜者二十餘人餘宥之三月敕授王東南面
兵馬都元帥鎮海鎮東等軍節度使浙江東西等道
管內觀察處置兼兩浙鹽鐵制置發運等使開府儀
同三司檢校太師兼中書令杭州越州大都督上柱
國吳越國王食邑一萬戶實封一千戶仍賜匡聖廣
運同德保定功臣夏四月太白晝見是月乙亥城西
上清宮災五月內衙指揮使釗滔以罪黜於處州六
月甲申日有食之秋七月朝廷命擒河中府李守貞
初守貞之叛求援金陵僞齊王景達舉兵應之未
幾守貞就擒淮人壓境而退

吳越備史卷四

三

是月王命弟宏億爲明州刺史冬十月敕遣散騎常
侍張照等持節備禮册王爲吳越國王仍賜玉册金
印法物等册曰惟乾祐二年歲次己酉十月庚午朔
越十九日戊子皇帝若曰我先帝承有晉崩離之後
醜類充斥毒螫中夏是用順天致罰大拯黎元太阿
一揮羣兇宵遁哀萬靈於無主解兆庶之倒懸較定
世勳以吳越居右伊朕眇躬虔奉先訓嗣位之始卽
疇懋功前命爲元帥按地圖授武節東南之境得行
征伐命册爲真王駕大輅執桓圭牛斗之鄉盡荒土
宇詢于有位僉曰克諧咨爾匡聖廣運同德保定功

臣東南面兵馬都元帥鎮海鎮東等軍節度使浙江
東西等道管內觀察處置兩浙鹽鐵制置發運營田
等使開府儀同三司檢校太師兼中書令杭州越州
大都督上柱國吳越國王食邑一萬戶實封一千戶
錢宏似象緯炳靈公王襲慶橫江負海者三千里開
國承家者六十年而能望辰極以駿奔奉天朝之師
律充庭納貢則外府告盈下瀨宣威則前茅獻捷忠
信著於羣后禮讓行於一方故元冕九章爲王之服
昭其名也朱輪駟馬爲王之馭昭其器也而又三吳
百越列土分疆有民人焉有社稷焉恢祖禰之令圖

吳越備史卷四

四

實典禮之鉅著勸夫忠孝以御邦家今遣正議大夫
守右散騎常侍上柱國賜紫金魚袋張煦右補闕崔
頌持節備禮冊爾爲吳越國王於戲品秩甚尊名數
尤重肅廣庭而備物揀吉日以覃恩爾其恪共厥位
事大以敬用教民順馭衆以惠用教民義居敬而行
惠神其福之禮曰惟王建國諸侯所以守舊邦書曰
惟帝念功王者於是出好爵匡我堯緒永爲漢藩浙
江如帶稽山如礪福祿無窮貽厥百世汝往欽哉對
揚休命

是月內衙指揮使諸溫以罪黜于溫州是歲下令以

境內田畝荒廢者縱民耕之公不加賦

時王募民懇荒田勿取租稅由是境內竝無棄田
或請料民遺丁以增賦王命杖之國門民皆大悅

庚戌

三年春二月金陵以僞永安軍節度使查文徽取
福州遣劔州刺史陳誨泉州刺史畱從効率兵犯我
無諸王命指揮使潘審燔率師禦之遂生擒查文徽
及行軍判官楊文憲等三十餘人斬馘萬計陳誨畱
從効等走之

初福人告文徽曰吳越兵已棄城去請公爲帥文
徽信之乃遣陳誨率水軍下閩江文徽自以步騎

吳越備史卷四

五

繼至城下閩州刺史吳誠詐遣兵數百出迎文徽
誨諫曰閩人多詐未可圖也宜立寨徐圖之文
徽曰疑則生變不若乘機據其城乃引兵徑進誨
整衆鳴鼓還于江湄吳誠與潘審燔等勒兵擊賊
大敗之遂執文徽等士卒戰溺死者一萬餘人陳
誨等率親部而遁

是月甲午丞相中書令鄖國公杜建徽卒

建徽字延光新登縣人祖仲明不仕累贈水部員
外郎父稜贊忠去僞功臣兩浙行軍司馬鎮海軍
節度副使常潤二州刺史初八都建稜率鄉黨以

武安爲號時武肅王輔董庶人起石鏡鎮旋平劉漢宏功業寢盛稜謂諸子曰吾每責人不過十罰則爲之傷心而觀錢公每有斬決皆談笑自若成大事者是人也當事之必貴吾族稜遂歸于我光啟三年命稜討薛朗平之遂爲常州制置使尋遷潤州乾寧中安仁義犯東陽命稜率師討平之及武肅王以宣州降卒隸中軍號武勇都前後左右皆無賴稜常患之乃密疏曰狼子野心稜觀武勇將士終非大王所蓄願以士人代之王弗聽及徐縮叛命使祭之旌其先見徽卽稜子也少強勇不

與諸弟類嘗於山莊構小茅齋輒私署軍州押衙紀於棟鄉里見焉驚因聞於稜稜亦加責徽對曰大丈夫何止一軍事押衙耶始從軍無事人之志及稜歸武肅王乃從父命而盡心於我稜在常州爲淮人所逼徽馳赴父難不及境而城已拔徽乃率所部還新登及稜自淮南歸軍中嚴整無改稜尤稱之徽累征伐皆單衣入陣賊衆無不披靡所至輒立大功軍中謂之虎子乾寧初從征董庶人被射中肩徽亦能軍開平中與武肅王弟鏢率師救姑蘇與敵遇因逼河河梁上斷乃鞭馬徑渡及

岸馬斃遂瘞之號曰馬塚至今存焉徐綰之叛徽馳自新登以本部赴難因命守禦時賊將聚木焚北門徽使持火鉤取其木先焚之遂不得聚賊計遂罷時有勸王東保會稽者徽按劔曰事苟不濟當同死於此必東渡亦售命於賊耳武肅王納之睦州陳詢之貳我也王以徽爲詢姻婭頗疑之乃使馬綽伺其意徽曰陳氏負恩背義自貽覆族之禍徽旣姻婭義當見疑然累書以諭之皇天后土苟或鑒照則拔城獲書方明徽心耳俄有睦州廳吏來降持徽所遺書至武肅王嘉歎久之賜徽錢

吳越備史卷四

七

一百萬徽兄建思嘗譖徽于武肅言其第中蓄兵仗將爲異圖王使人閱之徽方食使者強抵徽臥內徽但食不顧使者聞之武肅王感悟益加殊待及構第於城南王親與規畫徽性儉率出入導從不過數人凡財物多散鄉里親族武肅王每會王人必指之曰此杜丞相今日塵忝多其力也忠獻王時其孫昭達爲內衙都監使盛治第宅強徽觀之曰乳臭兒不諳事乃爾後昭達果以罪誅及春秋高尙能騎射嘗從擊毬于廣場興酣有宿中箭鏃自臂中飛出人皆壯之徽爲詩自敘曰中劔斫

耳缺被箭射脾過爲將須有膽有膽卽無價初稜
將亡散家財與諸子惟徽但受一笏稜曰此吾歷
任所秉者惟汝能傳之徽歷官自武安都將國子
祭酒至涇源昭化等軍節度使累官吳越國丞相
兼中書令封鄖國公皆自國初至忠獻王以來奏
授也凡子弟孫姪多連姻公室朱紫車馬充溢門
庭有國以來莫比其盛卒年八十八諡曰威烈

三月敕授王守尙書令增食邑二千戶實封五百戶

夏四月王以查文徽等獻于五廟國人爲之聳觀是

征伐以來擒獲雖衆而
獻俘之禮至是方備是月丙午王親享五廟六月

吳越備史卷四

八

敕授王兄東府安撫使宏儼知福州威勝軍事秋七
月戊寅命弟宏億爲東府安撫使冬十月王歸查文
徽于金陵十一月朔日有食之乙酉漢少主遇弒是
歲潭帥馬希廣爲其兄希萼所攻殺而自立臣于金
陵金陵遣將邊鎬守之盡遷馬氏之族于金陵是月

漢太后臨朝

辛亥廣順元年春正月丁卯周太祖卽位改元大赦漢
太后遷居西宮三月制授王諸道兵馬都元帥加食
邑一千戶實封三百戶仍降尙書令冊禮夏四月王
奉廢王居東府

卽越州王築宮室治園圃花卉山石池塘亭苑奉
廢王日娛悅之歲時供饋甚厚

夏六月丙午武勝清海等軍節度使王世父元懿薨
以其子仁做嗣

元懿字秉徽武肅王第五子母李氏懿有燕頷之
相起家鎮海軍右直都知兵馬使尋授安國衣錦
軍防遏指揮使累授檢校兵部尙書懿性至孝而
純直其母嘗侍武肅王指令不稱旨被捶自是成
疾每疾發侍婢多厭倦惟懿不離左右雖糞溷亦
親侍之常在衣錦城出遊諸野遇菖蒲花尋收之

吳越備史卷四

九

新定一日閭里間輒數處火起民頗憂恐有巫楊
韞因之遂興妖言曰某日某所復當火皆如其言
民由是競禱之懿謂左右曰火如巫言巫爲火也
宜殺之以息其奸於是命斬韞于市火遂絕貞明
中自新定判東陽東陽之南有白砂神郡人畏而
奉之每歲三月有大風雨自白砂起過郡城或言
神本海龍每歲一復東海爲怪壞民廬舍及懿臨
郡夢朱衣言白砂王奉啟相國今已他適將由郡
城且慮驚駭已由南山而去翼日風雨果如之人
皆異之頗喜遊宴彫飾之事文穆王襲國禮敬尤

篤懿每飲酒及其半而傾于地文穆王因宴乃致鈔鑼于懿前意諷其事懿自是遂改累奏授賓睦二州刺史清海武勝等軍節度使太傅同中書門下平章事金華郡王終年六十六諡曰宣惠在郡三十年初懿之在新定有卜士方氏時人號爲龜精常數卜以貽懿曰太乙接天河金華寶貝多郡侯六十六別處不經過至是果如其言

是月命復王從兄仁俊官爵

壬二年春二月制授王天下兵馬元帥增食邑二千

戶實封五百戶改賜推誠保德安邦致理忠正功臣

吳越備史卷四

十

夏四月朔日有食之敕衢州刺史王叔元瓚知福州威勝軍事王弟宏偓爲衢州刺史六月乙未王妣吳越國順德太夫人吳氏薨

夫人錢塘人諱漢月中直指揮使珂女也幼而婉淑奉文穆王恭穆夫人尤寵愛之夫人善胡琴性慈惠而節儉頗尙黃老學居常被道士服餘皆布練而已每聞王決斷政事有及重刑者夫人常頻願以仁恕爲言諸吳將有遷授皆峻阻之及其入對多加訓勵有過失者必面責之故諸吳終夫人之世不敢驕恣敕封吳越國順德夫人薨年四十一

諡曰恭懿

秋八月丁酉敕葬恭懿夫人于錢塘慈雲嶺之西原
九月甲寅朔丞相裴堅卒

堅字廷實吳興人父光庭累官至中書令有術士
張景歲能言休咎以紙大書怠字以貽光庭不旬
日果貶台州刺史大有政聲堅幼明敏善屬文及
長有知人之鑒事吳越國有善政條教有方累官
禮部尚書中書令拜吳越國丞相終年五十六諡
曰文憲

冬十月朗州指揮使劉言舉兵逐邊錡克復湖南獻

吳越備史卷四

十一

捷于朝廷朝廷以爲武平節度制置武安等軍事因
遷湖南節制府于朗州

癸丑三年春二月湖州所隸建州降卒鄭懷嵩等十一
人以刺史散香于資福寺遂率其黨二百餘人作亂
卽日盡誅之三月敕授王起復鎮東大將軍左金吾
衛上將軍員外置同正員王以兄宏儼爲溫州刺史
夏四月建報恩元教寺于城北薦王妣也王親閱內
外諸軍非驍勇者咸停放之冬十月大閱馬步軍艦
艫於碧波亭十一月命弟宏仰爲台州刺史十二月
湖南王達舉兵執朗州劉言囚之朝廷尋授王達湖

南節制是歲東陽有大象自南方來陷陂湖而獲之境內大旱邊民有鬻男女者命出粟帛贖之歸其父母仍命所在開倉振卹

甲顯德元年春正月丙子朔周主祀圜邱改元是月周太祖崩晉王卽位是爲世宗夏五月辛巳王命鑄王妣恭懿太夫人銅容二致于奉國金地二尼寺冬十月敕遣進奏使章思忠歸諭機事航艦不利思忠溺焉是月北漢主旻殂子鈞立

乙二年春二月朔日有食之三月制加王食邑一千戶實封四百戶夏四月庚子王親祀五廟秋七月庚

吳越備史卷四

三

午有虹入天長樓

樓在丙城之東

王避寢于思政堂九月王

復位于天寵堂閏月丁酉世子惟濬生冬十月乙丑

朔敕遣司空李穀率師伐金陵十二月王遣使入貢

敕王出兵會擊金陵是月王師渡淮

丙三年春正月車駕東征詔王以國兵分路進討是

月南擊揚門樓火金陵李景僭稱唐皇帝致書于京

師仍令僞皇太弟璉致書于統師李穀又遣僞宰相

孫盛等入貢二月王師入淮南靜海軍制置使姚彥

洪率家屬軍士戶口等一萬餘人奔于我是月王命

丞相吳程前衢州刺史鮑修讓等攻毘陵命指揮使

路彥銖等伐宣城命都指揮使羅晟等督水師次于江陰應王師也旣而敕遣殿直薛有光來宣諭仍賜沿身衣冠法物三月我師克常州生擒刺史趙仁澤偏將諸承向重霸等一百餘人遂班師

時營田副使陳滿言於丞相吳程曰周師南征舉國驚擾常州無備易取也吳程如其言請王從之丞相元德昭上曰唐大國未可輕舉也若我入唐境而周師不至能無慮乎吳程固爭王遂遣程取常州

是月金陵遣其僞燕王宏冀復據淮南王命從弟蘇

吳越備史卷四

三

州刺史文奉爲應援都統使屯于本州備徵發夏五月乙酉建州刺史陳誨以小船沿溪而下福州指揮

使馬進姚章等執於賊未幾誨亦宵遁是月車駕還

京師六月王命兄仁俊知福州彰武軍事

周改威武軍爲彰武

失書秋九月癸卯王親閱于龍山教場冬十月車駕

親征壽春是歲始括境內民丁益師旅也

丁巳四年春正月始議鑄錢三月王師大敗淮人於壽

春夏四月宣諭使薛有光航海歸于京師是月車駕

還京師秋七月庚子王命弟宏信爲衢州刺史八月

敕遣諫議大夫尹日就至賜王生辰御服紅袍二副

冬十一月車駕復東征是月泉州刺史畱從劾請修
貢于京師附我以聞詔從之

戊午五年春正月丁未前衢州刺史王弟宏偃卒

偃字贊堯文穆王第十二子也母陳氏偃性仁慈
事母以恭勤聞及爲郡時屬歲旱部民將逐食於
他郡民不忍別偃俱詣郡廳告白而去偃爲之流
涕其爲政寬恕厚重王友愛尤篤及卒中外無不
歎惜終年二十五

二月丁卯王師復維揚敕遣殿直趙誨來宣諭仍出
艘勝于瓜州步迎鑿鎮長風涉等處王師欲濟江乃

吳越備史卷四

四

命上直都指揮使邵可遷路彥銖等帥艦四百艘水
師二萬以會之江北諸郡悉平三月王不康丙午敕
命翰林學士都承旨陶穀司天監趙修己賜王羊馬
橐駝每歲班賜自此始也是月金陵李景復稱江南
國主遣僞臨汝郡公徐遼宰相馮延巳奉表稱臣於
行在王師乃罷

初金陵之將內附也王亦飛書以諭之旣而附我
以誠款聞詔從之

夏四月辛酉城南火延於內城王出居都城驛詰旦
烟燄未息將焚鎮國倉王親率左右至瑞石山命酒

以祝之曰不穀不德天降之災官室已矣而倉廩儲積蓋師旅之備實所痛惜若盡焚之民命安仰天其鑒之乃命從官伐林木以絕其勢火遂滅卽日王見丞相以下罪已之詔且曰吾旬月所苦尤至而災釁之餘遂覺康裕中外聞之頓安丁卯王命弟宏儀復爲東府安撫使是月敕遣天下都軍頭周廣來宣諭仍賜郤可遷以下及將士衣服有差五月辛巳朔日有食之唐主去帝號奉周正朔六月戊寅前台州刺史王弟宏仰卒

仰文穆王第十三子也母周氏仰善騎射通儒術

吳越備史卷四

五

能書寫及爲郡吏民畏服性雖嚴急而政事寬簡終年二十四諡曰成顯

秋七月敕遣閤門使曹彬賜王兵甲旗幟等物冬十月乙巳王遷于思政堂是月南漢主晟殂子鋹嗣

己未六年春二月甲申王遣丞相元德昭寧國軍節度

使吳延福入貢京師夏四月車駕親征幽并是月敕

升湖州爲宣德軍授王兄宏健特進檢校太尉充本

軍節度使五月熒惑犯心六月癸巳周世宗崩少主

卽位秋八月制加王食邑一千戶實封四百戶仍改

賜崇仁昭德宣忠保慶扶天翊亮功臣又敕王元妃

孫氏爲吳越國賢德夫人王世子惟濬爲鎮海鎮東
等軍節度副使檢校太保冬十月王重建功臣堂

庚申建隆元年春正月癸巳今大宋皇帝授禪大赦改

元封周少主爲王敕遣使來宣諭二月王但用今名

避廟諱也三月甲寅大慶堂成王舊邸也

堂寬廣高大凡百間

命勒碑文以紀其事夏四月敕授王天下兵馬大元帥加食邑

一千戶實封五百戶五月昭義軍節度使李筠叛丁

巳車駕親征六月甲午敕加吳越國賢德夫人爲賢

德順睦夫人又授兩軍節度副使王世子惟濬金紫

光祿大夫檢校太保充節度使是月敕升明州爲奉

吳越備史卷四

六

國軍授王弟宏億金紫光祿大夫檢校太保充本軍
節度使秋七月庚子潞州平敕遣通事舍人武懷節
來宣諭九月甲寅揚州節度使李重進叛車駕東征
是月王遣上直都指揮使孫承祐率師至潤以迎應
之庚申王以寧國軍節度使王舅吳延福等有罪竝
除名配外郡

延福等兄弟五人俱有異圖左右將校勸王誅之

王曰吾以先太夫人同氣之故安忍置之於法言

訖遂嗚咽垂涕衆皆稱賀於是黜延福等於外郡

以全吳氏之族

冬十一月丁未揚州平敕遣通事舍人王繼筠丁德裕來宣諭仍賜國信庚申敕遣西上閣門副使武懷節來宣諭甲子王命衢州刺史從弟宏信入貢十二月戊辰車駕還京是月王遷于功臣堂

辛酉二年春二月江南國主李景遷國于豫章三月敕

遣使丁德裕送王弟宏信回仍賜王戰馬二百匹羊五百口橐駝二十頭夏六月甲寅豫章李景昫子煜嗣位於金陵秋七月丁亥昭憲皇太后崩遣使來宣告自五月不雨至於是月王命取龍湫于天台山以祈雨九月始權酷冬十二月王命弟宏信復爲衢州

吳越備史卷四

七

刺史

壬戌三年春二月敕遣右殿直王著來宣諭仍賜國信夏五月東陽信安新定三郡民災戊辰王遣使振卹秋七月壬戌大風拔木八月庚寅泉州畱從効爲大將張漢思所殺漢思自稱權知清源軍事九月庚戌夜所在地震響如雷冬十月庚寅敕遣上殿直景德倫授兩鎮節度王世子惟濬爲邕州建武軍節度使庚子敕遣西上閣門副使武懷節至以泉州張漢思不稟朝命俾王責之翌日王遣使往責之漢思遂從

命焉

癸亥四年春三月朔日有食之是月王師盡取荆湘之地

初番禺衡州刺史張文表侵湖南朝廷援之遂執文表及班師因取二地荆帥高繼冲潭帥周保權並入于京師

夏四月丁未泉州張漢思爲四門指揮使陳洪進所幽洪進歸命于王請命于朝遂授洪進平海軍節度使檢校太傅秋九月丁巳重建天寵堂壬申大閱艦船于西湖賜內外將校服帶有差冬十月甲申獲魚於江壩長九丈六尺十一月甲子太祖有事南郊大

吳越備史卷四

六

赦改元乾德王命姪昱入貢敕遣引進使丁德裕來宣諭仍加王食邑一千戶實封四百戶改賜承家保國宣德守道忠貞恭順功臣又加建武軍節度使王世子惟濬檢校太尉十二月孝明皇后崩敕遣使來宣告是月命姪郁爲秀州刺史

甲子乾德二年春正月戊寅朔大雨震電二月戊申朔

日有食之三月制授王起復天下兵馬都元帥加食

邑一千戶實封四百戶夏四月重建城南寶塔寺成

鑄武肅王文穆王忠獻王銅容供於寺秋八月庚申

王復位于天寵堂謂丞相以下曰頃以寡德遂貽災

覺曾未十年中外如斯實宗廟之休公等之力然作
之者勞吾不敢忘更賴公等以輔不逮丞相以下咸
稱大慶冬十一月王師伐蜀王乃命親從都指揮使
行軍司馬孫承祐等率師會焉
三年春正月乙酉西川平蜀主孟昶入于京師二
月壬寅朔日有食之乙丑王命姪台州刺史昱入賀
秋七月有虎於龍山凡傷數十人捕之逾旬而獲八
月癸卯重建寶塔寺于城北是月敕遣通事舍人張
延來宣諭仍賜生辰禮物甲寅丞相吳程卒

程字正臣山陰人祖可信定州虞唐縣令父蛻大

吳越備史卷四

九

順中登進士解褐鎮東軍節度掌書記右拾遺累
官禮部尙書起家校書郎武肅王承制累授檢校
戶部員外郎借緋長興初王女將選婚于士族乃
以孟彖于葆暨程等三人見于王庭武肅王熟視
程乃選之承制遷金部郎中借金紫以程有吏術
因命提舉諸司公事文穆王襲國奏授程爲職方
郎中觀察支使節度判官天福中文穆王子儂遙
典睦州命程知州事忠獻王時以程判西府院事
尋拜丞相福州李儒贇伏誅授程威武軍節度使
乾祐三年淮人侵福州程受諸軍節度獲其將查

文徽初淮人方薄閩城授甲於將卒而將卒充溢
庭廡紛然不可遏程因登檻瞋目叱之衆皆股栗
自是軍政嚴肅程始在東越以父蔭不事苦學有
謂程曰觀子骨法與羣儒類但恨他日登將相不
長談論耳程遂勤學文穆王時有西府院官滕攜
嘗夢程化爲赤龍望南方而去攜因語其夢於人
曰吳氏子非我所測也及爲福州始驗其兆尋以
國用繁廣乃命程兼掌屯田權酷事乾德初程夢
一羽人布策于前曰計子之算而所遺者三果三
載而卒年七十三謚曰忠烈

吳越備史卷四

三

冬十一月王命從叔前知福州彰武軍事元瓚爲睦
州刺史姪昱復爲台州刺史

丙寅四年春正月乙亥宣德節度使同平章事王兄宏
偲卒

偲字惠達文穆王第八子也母陳氏起家內衙諸
軍都知兵馬使檢校司空年十八出爲湖州刺史
有妖巫登衙門大樹恣爲鬼神語州人皆驚畏偲
曰妖由人興乃命注弩射之巫果請命因鞭之州
人咸服偲明吏術能爲詩頗有奇句王嗣位恭敬
尤篤顯德中王城災悉以器服用玩上之累奏授

特進檢校太尉宣德軍節度使建隆初敕授同中書門下平章事終年三十八謚曰恭義先是大星隕于西北月餘僊終焉

夏五月丙戌王從兄婺州刺史仁做卒六月敕授王子內衙都指揮使惟治爲容州甯遠軍節度使金紫光祿大夫檢校太保九月壬寅王避正寢于功臣堂以計都入須女也癸卯王兄知福州彰武軍事宏儼卒

儼字智仁文穆王第二子也本名宏偁起家上直副兵馬使檢校尙書右僕射二十餘年爲東府安

吳越備史卷四

三

撫使洞曉政術吏不敢欺文穆王嘉之賜金酒器一副因命兼領新定性簡儉善騎射能書有文而自晦福州初歸我將校有仇憾者率多相誣謂左右曰人各有憾如一啟之誣構交生人相疑懼豈國家推心懷遠之道也因悉不問閩人莫不感悅尋鎮永嘉愈事清率所蓄聲伎悉放之每食不過鮑魚菘菜而已顯德中嘗因入覲溫人謂其將代乃臥轍阻之儼乃復伺夜出人皆宿於城門詰旦侍妾以籃輦先出衆疑儼在其中遽擁而迴官吏具聞王命示歸期人始從焉溫人舊苦徭役儼乃

置簿書以均之民感其惠多爲僇醮本命又俗尙
淫祀儼皆鎖其祠宇器玩以充公用及移鎮無諸
溫人有攜家以從者謂之隨使百姓儼出城日皆
行啼巷哭曰願公早回至是以神樞由溫江歸會
稽三郡之民爲之號踊凡兩鎮無諸會稽一鎮永
嘉通任二十餘年承制累授檢校太尉拜丞相終
年五十有四諡曰節惠

冬十一月甲寅命王弟信知婺州武勝軍事

丁卯五年春二月丁卯除睦州刺史王叔元瓚知福州

彰武軍事戊辰王弟奉國軍節度使億卒

吳越備史卷四

三

億字延世文穆王第十子母沈氏初孕文穆王夢
僧入寢帳及生故字日和尙起家內衙諸軍左右
都虞侯檢校左僕射性俊拔善屬文年二十一出
爲明州刺史頗著善政凡科率舊制除出之顯德
中王命括民丁將益軍旅州縣長吏因之多所殘
斃億乃手疏之辭理切直王感悟遂寢其事王嘗
與丞相以下論及時務且言民之勞逸率由時君
奢儉因爲詩二章以言節儉之志命億應和億以
北方侯伯多獻淫巧乃因詩以風刺王嘉歎久之
仍賜詩以美其意億嘗以息女許王舅吳氏子而

諸吳驕恣日益遂怒之自是不通時人稱其強正
建隆初奏授明州奉國軍節度使檢校太保末年
夢金甲神告其終期因會賓客飲酒與之訣寢疾
三日而終年三十九諡曰康獻

壬申敕祀禹祠于東府己卯王從兄溫州刺史仁俊

卒三月五星聚奎如連珠在降婁之次太平之兆也是月建武軍節

度使檢校太尉王子惟濬入貢而還賚賜吳越國賢

德順睦夫人珠翠冠帔等夏四月辛巳命王子寧遠

軍節度使惟治兼判奉國軍事秋七月辛亥敕授王

弟儀依前鎮東軍安撫使金紫光祿大夫檢校太保

吳越備史卷四 三

冬十月王遣元帥府掌書記黃彝簡入貢是月敕遣

使至賜王生辰禮物十一月辛酉大閱于教場仍宴

將帥

辰六年春三月乙酉丞相元德昭卒

德昭字明遠撫州南城縣人父仔昌任新撫饒信

四州刺史淮南節度使檢校太傅仔昌之在信州

也頗傾心於我屬衢睦作叛亦有犄角之力及為

淮人所攻其下內叛遂奔於我武肅王禮以賓席

惡其姓危氏乃更曰元因為錢塘郡德昭起家鎮

東軍節度巡官錢塘縣令累授睦州軍事判官知

台州新亭監始在信州仔昌使日者視諸子曰者
指德昭曰獨此子非武官及學文其師授以文體
文穆襲國命林鼎爲丞相曰元德昭有輔翼之才
兵機細務悉以委之尋拜丞相王卽位禮遇彌至
德昭厚重多謀臨事而不撓每屬嚴警議者盈庭
德昭至則他論皆息軍中有不循理者德昭以事
諭之無不聽服性嗜酒雖沈醉無所怠事晚年衰
耗王見之謂左右曰吾向見德昭容色衰倦如一
旦不諱人誰輔吾因泣下德昭理家以孝愛聞每
時序置酒環列几席者凡四代常爲詩云滿堂羅

吳越備史卷四

雷

綺兼朱紫四代兒孫奉老翁及寢疾自爲埋文治
後事終年七十有八中外無不歎息諡曰貞正

己已建奉先寺于城西薦文考也夏六月戊午長洲
縣民王安妻產三子秋七月北漢主鈞殂養子繼恩
嗣九月北漢將侯霸榮弒其主而以繼元嗣壬辰知
福州彰武軍事王叔元瓚卒

瓚少強直好詩學武及長從征有功屢授是任凡
在麾下者畏服嚴明無有敢犯處兄弟不疑事文
穆及王盡臣禮以此上下和睦卒年六十有七

是月敕遣使賜王生辰禮物冬十月辛酉命世子建

武軍節度兩軍副大使惟濬兩浙行軍司馬孫承祐
入貢助郊祭也十一月癸卯皇帝南郊大赦改元開
寶十二月己酉朔日有食之

大宋 祐元年丙申歲正月七日四代孫朝奉郎
守尚書刑部郎中集賢殿修撰知梓州軍州事兼
管內橋道使提舉戎瀘等七州賊盜甲兵專句當
泃溪夷人公事上護軍賜紫金魚袋錢中孚寫

大宋紹興二年壬子歲六月二十七日七代孫迪
功郎前河南府儀曹掾錢渙伏覩曾祖修撰所傳
吳越備史於蔡子發家遂取而歸復藏吾家焉在

吳越備史卷四

壹

臨安府寶蓮山寺題

吳越備史卷四 終

吳越備史補遺

舊本備史皆止於戊辰年而忠懿之事未終此卷不知作自何人蓋參本傳及秦王貢奉錄家王故事爲之或以合於備史今釐正之

開寶二年春正月制加王塗色三千戶實封六百戶
是月遼主明辰嗣位秋八月敕遣使至賜王生辰禮物
并御衣紅袍一副金鎖甲一副及駝馬一百頭
三年春三月王親饗五廟秋九月王遣子惟濬入貢
是月詔王出師伐富州王將起師尋以路遠詔止之
四年秋九月敕遣使賜王生辰禮物衣冠劍佩等物
冬十一月皇帝南郊制加王食邑二千戶實封六百

吳越備史補遺

一

戶仍改賜開吳鎮海崇文耀武宣德守道功臣
五年春三月建武軍節度使檢校太尉王世子惟濬
貢奉歸寶賜吳越國寶德順睦夫人珠翠冠帔各一
副秋九月王遣元帥府掌書記黃彝簡入貢太祖謂
彝簡曰汝歸語元帥當訓練兵甲江南倔強不朝我
將討之元帥當助我無信人言唇亡齒寒王密表謝
且請師期冬十月王親饗五廟復謁寶塔寺拜先王
銅容
六年秋八月敕遣使賜王玉帶一條御衣一襲及生
辰禮物冬十一月二日大雪雪氣如煙

七年夏五月敕遣進奏使文贊賜王襲衣玉帶玉鞍勒馬各一事金器二百兩銀器三千兩錦繡一千段秋七月敕詔王取常州詔曰敕錢俶朕統御萬邦撫臨兆庶推至誠而待物期率土以歸心布惠行仁是予本志興師動眾非我願爲惟彼江南言修臣禮久被撫綏之化頗傾依附之心貢封章則惟見恭勤修外貌則多從減降旣云事大每欲包荒甘言嘗信其赤心內念豈疑其姦計而又疊傾誠款願降冊封旣禮分之未虧故我心之無間使人頻至詞旨愈專是以特降近臣俾其略來赴闕頒宣優厚恩禮殊隆何

吳越備史補遺

二

期終日包藏一朝敗露不惟多方託故懇避來朝而乃修葺城池選練軍旅教習戰陣抽點鄉兵爲捍拒之謀作攻守之備朝廷養寇垂二十年心狠貌恭突然自敗向展爲臣之禮適滋觀釁之方每云傾輸動彰狡詐旣行問罪須至興師今者禁衛出軍雲臺選將尅期攻取直抵昇州卿任重統戎心專蕩寇况早者曾披章奏具述事宜今驗姦兇果符陳請聞茲討伐必罄忠勤今候丁德裕到彼往三五日可部領兵士起發且往攻取實爲民倚之懷寤寐無已故茲詔

示想宜知悉

吳越備史補遺

卷之五 王襲衣玉帶玉鞍

是月王密遣行軍司馬孫承祐入奏機事九月孫承祐自京賈密詔回師期定矣王卽日命境內訓練士卒揀閱兵甲是月敕遣內客使丁德裕賜王生辰禮物冬十月敕授王東南面招討制置使仍賜御劔一口御甲一副金鞍玉馬一匹仍命丁德裕爲行營兵馬都監又以雲騎雄捷等指揮步兵凡千人輔王進攻常州是月庚申王親率鎮國鎮武親從上直等都指揮使王諤等五萬餘人發自國城丁德裕爲先鋒使是日天氣晴和風色便順癸亥次嘉禾有氣黑色形如覆舟當行府之上占者曰王氣也丙寅王率諸

吳越備史補遺

三

軍入毘陵前鋒所至賊望風而遁有獲巨龜于旌門之下占者曰元武之應也戊辰王次毘陵遂克關城常人以牙城自守王命營于九僊墩命親從指揮使凌超等分營四門命鎮國都指揮使王諤攻江陰鎮武都指揮使金彥滔攻宜興竝率水艦由吳興出太湖而進十一月詔遣弓箭庫使王文寶來宣諭仍賜湯藥以金盒盛封至是月王遷行府于賊城南門金彥滔克宜興獲其令尉等官士卒凡二百五十人馬八十匹王卽命金彥滔獻于京師十二月癸亥王親率軍將攻拔城寨殺賊軍二千餘人生擒六百餘人

辛未又敗賊萬餘人於城北金陵大將盧絳宵遁是
城中旣危金陵遣大將盧絳率萬人來救至是敗之絳僅以身免翌日王命鈐轄使
沈承禮等並告于京師

八年春二月詔遣內直使陳理來宣諭仍以戎服五
萬副賜王軍卒又賜王將帥服帶器帛有差是月王
率大軍攻其壘不克夏四月我師復大攻城壘時僞
知常州軍州事禹萬誠遣觀察推官鄭簡降款于軍
門且請命焉王從其請禹萬誠等詣行府待罪王賜
以衣冠器幣等悉送于京師以請命又命羊酒置其
家以安慰之江陰寧遠等軍沿江石橋等寨軍兵來

吳越備史補遺

四

降王悉宥之是月敕遣使來宣諭授王守太師尙書
令加食邑六千戶實封九百戶仍賜湯藥及沿身法
物等五月詔客省使丁德裕權知常州仍又敕遣上
侍禁李輝賜王襲衣玉帶玉鞍勒馬各一事金器二
千兩銀器一萬兩錦綵一萬段詔王歸國是月王遣
兩浙諸軍都鈐轄使沈承禮等率兵會王師于金陵
先是毘陵降人凡三千餘口至是悉分還本郡仍表奏之詔書褒焉
冬十一月王師克金陵僞主李煜出降

是日冬至軍中皆會飲承禮會諸將曰城中以我
節序必有讌享備我怠矣宜出其不意以圖之乃

召敢死士千人以火攻其城陷其東門士皆賈勇
攀壘而上王師觀之亦攻其南焜危迫遂出降焉
是月王乃表賀之復遣大將孫承祐上表請入覲十
二月王克金陵有功敕遣東頭供奉官徐靖賚賜王
綵錦八對御衣一副金盃一頂金甲一副御酒一百
瓶駝馬三百匹仍賜御札一通褒焉又賜王麾下孫
承祐爲平江軍節度使沈承禮爲寧海軍節度使又
賜爲防禦使者三人爲刺史者六人賞克金陵之功
也是月詔許王入覲焉敕錢徽省所差鎮東軍支使
王通今月二十八日走馬到闕奏今月十五日僞命

吳越備史補遺

五

知常州禹萬誠等歸附已安撫城中事具悉卿位高
王霸天付將才門專衛社之勳世著勤王之節昨者
親提銳旅取彼堅城勢孤而旣絕援兵力盡而遂輸
降款遽歷寒暄之候遂成克復之功永增史冊之光
輝實協君親之任委甚爲嘉賞不捨寐興故茲獎諭
想宜知悉

九年春正月庚申王發自國城先是太祖皇帝因王
入覲敕遣供奉官張福貴淮南轉運使劉德音開古
河一道自瓜州口至潤州江口達龍舟堰以待王舟
楫之至其堰遂名曰大通堰又於京城之南敕建大

第連亘數坊棟宇宏麗儲峙什物供帳之類皆御王者賜名曰禮賢宅以俟王駐節焉三月辛丑王次寶應敕遣引進使翟守素至賜王湯藥以金盒盛之又賜金鞍轡馬二匹仍押御厨儀鸞翰林皆至焉甲辰王次泗川敕遣內臣至賜馬三百匹駝一百頭以載行李辛亥又遣內司賓泊內臣至賜王夫人孫氏湯藥二金盒法酒五十瓶茶果五十盒是日次近畿皇帝詔山南東道節度使興元尹皇子秦王德昭迎勞仍賜法酒一百瓶子一百盒翌日王至京師詔興元尹賜宴於迎春苑尋詔王居禮賢宅王未至前數

吳越備史補遺

六

日太祖幸其宅躬自閱視其恩禮如此戊午王朝見于崇德殿進賀平江南及允朝覲表貢奉犀玉帶及寶玉金器五千餘事上酒一千瓶遂賜宴于長春殿中席就幄次賜黃金照匣黃金鈔鑪及餅盤等皆御物也已未王進謝詔宴于後苑丙寅駕幸禮賢宅賜金二千兩銀三萬兩絹二萬疋又賜王世子建武軍節度使惟濬及陪臣通儒學士崔仁冀等絹帛有差是日王遣世子又進通犀帶二條金玉寶器五千事三月制賜王劔履上殿詔書不名進封王夫人孫氏爲吳越國王妃封王女爲彭城郡君仍詔內臣賜王

妃湯藥法酒茶果等五百餘事翌日宰臣上言異姓諸侯王無封妻爲妃之典上曰行自我朝蓋旌忠賢何必古也時又詔王宴於苑中獨太宗秦王侍坐酒酣上命王與太宗秦王敘昆弟之禮王叩頭陳讓再四翌日太祖將幸洛陽詔王歸國王懇請隨駕詔不許惟畱王子惟濬從行是月王奉辭詔遣賜金器二千兩銀器一萬兩銀三萬兩對衣玉束帶玉鞍轡御馬一匹細馬五匹綾羅錦段共八萬疋銀裝戎器八百事散馬一百匹銜墜腰帶絡縫衫等共二千事又賜王麾下將帥等官錢帛有差太祖謂王曰南北風

吳越備史補遺

七

土炎暑不同宜加調護卿可早歸又親賜密封黃綾包袱一封謂曰卿至途中宜密視之王涕泣進言願三歲一朝上曰川陸迂遠當俟我詔旨卽來次日王妃入辭中宮賜金器三百兩衣著二千疋銀二千兩是邦軍戍王離京師詔秦王賜宴於迎春苑敕遣引進使翟守素押翰林御廚儀鸞送至睢陽次日又遣入內小底乘驛至賜王湯藥二金盒王妃湯藥一金盒戊子王在舟中再拜乃密開所賜黃袱視之皆羣臣乞畱王章疏也王既入朝文武羣臣屢上疏乞畱王太祖知王忠厚謹慎固不允及王起行時密以賜焉夏四月丙辰王至國城丙寅王命子惟治

詣闕謝恩卽日王視事移座于東偏謂左右曰西北者神京所在天威不遠顏咫尺某豈敢寔居乎五月太祖郊畢制加王食邑三千戶實封一千戶秋八月敕遣進奏使汪知杲至賜國信及生辰禮物冬十月太祖宴駕太宗卽位大赦改元太平興國敕詔以封命諭王

以廷美爲開封尹齊王德昭爲永興節度武功郡王德芳爲興元尹

又敕遣侍

御史雷德讓來告哀王率府僚將校等發哀王二日

不食十一日不視事十一月王遣元帥府衙內都指揮使王子惟渲賫通天犀帶一條金器五百事玳瑁器五百事塗金銀香龍等巨萬詣闕以爲賀是月敕

吳越備史補遺

八

遣樞密都承旨武珍制加王食邑五千戶實封一千戶仍賜龜魚寶帶襲衣等是月吳越國王妃孫氏薨太平興國二年春二月敕遣給事中程羽來歸王妃之贈諡王妃曰夏五月王下令以文軌大同封疆無患凡百禦敵之制悉命除之境內諸州城有白露屋及防城物亦令撤去之秋八月詔遣翰林學士都承旨李昉賜王生辰禮物是月王遣兩軍節度使世子惟濬入朝修覲禮也

三年春二月六日王發國城三月二日次揚州敕遣閩門使梁迥內班閩承翰來賜王湯藥茶酒及押諸

司官迎接七日次洪澤驛敕遣供奉官李思彥至賜
王湯藥一金盒玉鞍轡馬一匹散馬三十匹玳瑁絨
毛暖衣等物及賜從行將校有差十五日王次宿州
又遣入內小底副行首蔡守恩賚詔至賜王龍茶三
觔以金盒盛之御酒二十瓶荔枝鵝梨石榴共六百
顆以銀裝籠子盛封十七日王次永城時太宗敕遣
王世子兩軍節度使惟濬迎候以內班李神佑領翰
林儀鸞御厨諸司隨世子至賜御筵一席是日王卽
遣節度使孫承祐先賚表詣闕陳謝是月二十三日
王次陳畱孫承祐自京至傳宣撫問二更閣門使梁

吳越備史補遺

九

迥又至復傳宣撫問二十四日王至京師敕詔皇太
弟開封尹廷美賜宴于迎春苑仍遣賜王對衣八事
玉排方腰帶金器一千兩銀器一萬兩細衣三千疋
玉轡鞍馬一匹是日王安居于禮賢宅二十六日朝
見于崇德殿謝恩及謝差親王迎接賜宴于長春殿
王進法酒五百瓶金銀器物三千兩綾錦一萬事龍
鳳香等二萬事翌日遣使賜王生料羊二百口法酒
三百瓶粳米二百石雜買錢一萬緡草料柴炭稱是
又賜從行將校等官錢三萬緡二十九日遣內司賫
來賜果子三十盒法酒一百瓶蒸羊食物等十匱三

十日詔王宴于後苑王復進寶玉金銀酒器等三千兩通天犀帶一條龍鳳龜魚帶六事時太宗命射每中的者卽進金銀器三百兩太宗中的者六夏四月八日詔王宴于崇德殿二十三日宴王于後苑二十六日詔王宴于南郊御莊王又上酒器金銀器皿等共二千餘兩王酒酣至暮而歸第次日遣內司寶賜王御衣紅袍一副綵衣六事寶帶一條金銀酒器三千兩細馬四匹御馬一匹儀鸞一副是日王進拜表謝恩仍請以吳越封疆歸于有司優詔不允表略曰伏有懇誠貯于肺腑幸因入覲輒敢上言蓋虞神道

吳越備史補遺

十

之害盈必冀天時之從欲臣近蒙賜劍履上殿詔書不名仍以本道召募卒徒嘗營戈甲特建國王之號并增師律之嚴皆所以假其寵名誇於隣國方今幅員無外名數洞分豈可冒居自耀公議合從省罷以正等威除本道軍甲器皿已曾奏納外所有封吳越國王及天下兵馬大元帥職名竝乞解罷凡頒詔命悉願名呼庶聖朝無虛授之恩微臣免速亡之禍五月三日遣內使賜王湯藥四金盒金器二百兩銀三千兩次日王再上言請之略曰臣慶遇承平之運遠修肆覲之儀宸眷彌隆寵章皆極斗筭之量實覺

滿盈丹赤之誠輒茲披露臣伏念祖世以來親提義
旅尊戴中京略有兩浙之土田討平四方之僭逆此
際蓋隔朝天之路莫諧請吏之心然而稟號令於闕
庭保封疆於邊徼家世承襲已及百年今者幸遇皇
帝陛下嗣守丕基削平諸夏凡在幅員之內悉歸輿
地之圖獨臣一邦僻在江表職貢雖陳於外府版籍
未歸於有司尙令吳越之民猶隔陶唐之化太陽委
照不及葑家春雷發聲尙爲聾俗則臣實使之然也
罪莫大焉願以所部十三州獻于下執事其間地里
名數別具條析以聞伏望陛下念奕世之忠勤察一

吳越備史補遺

十一

心之傾向特降明詔允茲至誠
是月六日乃下詔從之詔曰卿世濟忠貞志遵憲度
承百年之堂構有千里之江山自朕纂臨來修覲禮
覩文物之全盛嘉書軌之混同願親日月之光遠忘
江海之志甲兵樓櫓旣悉上于有司山川土田又盡
獻于天府舉宗效順前代所無書之簡編永彰忠烈
所請宜依於是所部州十三縣八十六戶五十五萬
七百兵一十一萬五千暨民籍倉庫盡獻于朝帝御
崇元殿受之是月王麀下將校軍佐聞之皆慟哭曰吾王不歸矣敕陞揚州爲
淮海國制王依前守太師尙書令兼中書改封王爲

淮海國王食邑一萬戶實封一千戶仍充天下兵馬
大元帥仍改賜寧淮鎮海崇文耀武宣德守道功臣
以王弟宏儀宏信竝爲觀察使以王子惟濬惟治竝
爲節度使十三日賜王淮海國王金印一面仍賜禮
賢宅爲永業十五日又授王子惟演惟灑及未官者
子弟并麾下將校孫承祐沈承禮竝爲節度使等官
有差又賜幕府宰相而下拜官者二千五百人二十
三日詔王宴于長春殿至暮歸第六月四日詔王宴
于後苑命世子惟濬侍坐泛舟于宮池十五日遣入
內小底賜王湯藥四金盒對衣四事八寶玉帶二條

法酒一百瓶二十四日詔王宴于御莊秋七月命京
城張燈於王宅第前後賜設燈山陳樂聲以寵之十
八日詔王宴于崇德殿命世子惟濬侍坐焉二十六
日遣使至王第慰問仍賜茶藥一金盒八月六日詔
王總麻以上親竝赴闕授以官爵九日命以杭州伶
人馬迎恩等四十五人賜王俾備旦夕宴樂十四日
詔王宴于後苑泛遊宮池二十四日遣內使賜王生
辰禮物九月九日詔王大宴于長春殿歡樂終日二
十日王忽染疾太宗傳宣旦夕遣使撫問二十五日
又遣內司實賜王茶果湯藥等冬十月七日王進朝

謝賜宴于後苑十一月朔太宗南郊禮畢詔加王食
邑二千戶實封一百戶十二月八日遣使賜王蒸羊
食物茶果等共十三匱法酒一百瓶二十五日詔王
賜宴于長春殿至暮歸第特輟御前二大燭送焉

已四年春二月王入朝賀大宴于苑中太宗顧王甚

厚飲必命醕王大醉及罷拜不能興太宗仍以金裝
擔子送王歸第仍以賜之是月車駕征太原王請從
行翌日詔中使別押諸司供帳御厨從王每旦夕傳
宣撫諭錫賚殆無虛日王小心畏慎每晨趨闕必先
至宮門假寢以待一日夜漏四鼓清蹕啟行時風雨

吳越備史補遺

三

大作諸節鎮無一人至者太宗見王與世子惟濬稱
歎久之謂王曰卿中年宜避風冷自今入見不須太
早仍輟御前二大燭賜焉又召王旦夕宴飲一日中
頓賜王從官酒食并衛士羊肩卮酒觀其飲啖太宗
見其雄壯因顧王王進曰正所謂如虎如貔如熊如
羆上大悅翌日會劉繼元降上御連城臺誅中軍先
亡命於太原者時大臣皆侍坐太宗顧謂王曰卿能
保全一方以歸於我兵不血刃深可嘉也仍賜紅袍
一副玉鞍轡馬一匹細馬二匹又賜世子惟濬細馬
一匹綵衣一副秋七月車駕凱旋大行封賞中書進

擬加王食邑一萬戶實封一千戶以麻卷入御筆改
增加王食邑二萬戶實封二千戶是月二十六日王
入朝賀進金銀器三千兩錦綺三百疋卽宴王于苑
中又命世子惟濬侍坐八月二十四日遣中使賜王
生辰禮物冬十月六日遣內使賜王法酒二百瓶御
食八匱十一月十二日宴王于長春殿十二月十九
日詔王宴于崇德殿酒酣至暮歸第

吳越備史補遺

西

於殿廡飲必唱籌顧謂王曰卿中年宜以此娛况今
清明令節宜加調護王啟陳謝夏四月一日王以風
疾告假遣御醫中使一日三至第仍賜湯藥茶果間
日一至六月三日車駕親幸禮賢宅撫慰再四仍賜
金器一千兩錢一萬索銀一萬兩綾絹一萬疋王遣
子惟濬進謝秋八月十一日車駕又臨撫慰親賜湯
藥二金盒二十三日遣中使賜王生辰禮物九月十
一日王進朝謝于崇德殿復上金裝定器二十事水
晶瑪瑙寶裝器皿二十事珊瑚樹一株冬十月二十
一日詔王宴于朝元殿至暮又以金裝肩輿送王歸

第仍以賜焉又以御前二大燭前導十一月戊午駕幸大明府王請從駕詔許賜王肩輿昇從行七日太宗獵於城之東時風寒頗嚴令中使傳宣俾王先回是月二十日車駕還京

六年春正月王風恙復作遣尙醫中使絡繹而至自是賜王免朝二月太宗南郊禮畢制又加王食邑一萬戶實封一千戶夏五月王尙在風疾遣中使以紫白水晶棊子盛以金盒雜寶文楸棊枰賜王且諭曰朕萬幾之暇頗畱意卿疾未痊宜用此自怡一日內臣趙海常被酒詣王府第將吏以爲傳詔者亟稟于

吳越備史補遺

五

王卽進寢室見之海因問王疾何如王曰足疾已久沈痼今又加之風眩海探懷中出藥百粒以奉王時王方命茶盡餌之諸子孫及左右惶懼憂駭計無所出海旣去家人皆泣蓋有所疑也王笑曰主上待我甚厚中貴必良藥也翌日太宗聞之大驚卽遣中使撫慰乃杖海舂二十桎梏坐海於王第門者三日然後流海島王遣世子惟濬陳謝太宗撫問久之又賜湯藥一金盒六月十一日王復貢黃金三千兩白金二萬兩秋八月二十四日遣內使賜王生辰禮物翌日駕幸禮賢宅王疾尙未痊出迎拜不能與太宗親

曳之撫問再四王侍坐進茶太宗仍賜細茶果二十
盒祛風法酒二十瓶又賜王子以下絹帛有差冬十
月一日王朝謝于文德殿太宗大悅攜手撫問良久
遂賜宴于長春殿謂王曰卿恙稍可天氣嚴寒宜避
風冷自後免入朝王稽顙陳謝十二月二日遣中使
賜獸炭一千擔柴米稱是

七年春三月太宗貶秦王廷美爲西京畱守夏四月
王風疾復發太宗遣中使慰問賜王湯藥一金盒又
遣入內小底以龍鳳簫笛娛王終日秋八月二十四
日遣中使賜王生辰禮物翌日王遣子惟灝進謝貢

吳越備史補遺

六

金銀器皿五千兩八年春正月十三日遣中使賜王
珍珠寶燈一座仍命坊市張燈于王第前後俾王怡
悅三月三日詔加王食邑二千戶實封五百戶夏五
月遣內使賜王珍珠黃羅傘一龍香涼茶二十筋秋
八月二十三日遣使賜王生辰禮物翌日王遣世子
惟濬貢上白龍腦香一百筋金銀陶器五百事銀二
萬兩黃金一千兩冬十月王以天下無事兵革偃息
乃讓大元帥及國封表上但許罷兵柄其國封如故
仍加王食邑三千戶實封五百戶十二月六日遣中
使賜筵一席以儀鸞迎送王第近代無比

雍熙元年春二月二日上幸太乙宮路由禮賢宅王力疾出見于道傍上駐輦撫諭至于再三及駕返命取他路歸遣中使諭王恐煩迎接徑由他路歸矣夏四月十三日遣中使賜湯藥二金盒秋八月二十三日遣中使賜湯藥賜王生辰禮物冬十月華山陳搏號希夷先生謁王王問先生得養元默之道搏曰山野之人何知神仙黃白之術也十二月十一日太宗郊禮禮畢進封王爲漢南國王崇文耀武宣德守道功臣

二年春正月太宗以王善於草隸遣中使取王草書

吳越備史補遺

七

筆迹王以風疾手不能握筆命將往時所書絹圖草字遣世子惟濬同中使以進下詔獎諭仍賜金盒玉硯一副龍鳳墨一百珽紅綠筆一千管盈丈紙二百軸白絹三百疋幕府宰相洎朝中大臣文士撰恩賜漢南國王金匣玉硯詩文進上觀覽命黃絹圖本遣賜王夏四月召王宴于後苑帝曰春氣暄和萬物暢茂四海安寧朕當以天下之樂爲樂宜令賞花賦詩五月駕幸禮賢宅撫慰久之命王取平日所書隸書觀看太宗大悅收取數幅翌日遣中使賜王御筆二百枝龍墨二十珽紅袍一副秋八月二十三日遣中

使賜王生辰禮物九月九日召王扶疾宴于崇德殿是日楚王元佐廢爲庶人

元佐太宗長子也聰敏鍾愛之因力救秦王廷美貶不解遂發狂會重九宴諸王元佐以新瘥不預諸王歸過元佐遂恚曰是棄我也因夜縱火焚其宮太宗怒遂廢之

冬十月遣內使賜王夫人龍鳳珠冠一頂金三百兩銀二千兩十一月十五日遣中使賜王幕府將校幣帛又加授王子惟治等九人官爵有差

四年春二月太宗以王疾未痊詔免入朝改封南陽

吳越備史補遺

六

國王仍賜領南陽節鉞加食邑二千戶實封一千戶麻降王復抗表陳讓國事表四上四月王將赴南陽詔免入辭賜御衣一副襲衣玉束帶一條金器一千兩玉石器皿一百事銀器一萬兩仍詔山南道節度使王子惟濬送王至尉氏縣詔雍州團練使王子惟渲韶州刺史王子惟灝竝從王行是月二十六日王發京師詔遣中使賜御酒二百瓶龍茶二觔櫻桃二金盒仍遣中使押翰林儀鸞御厨送王五月王遣子惟灝詣闕謝恩貢上鰲山寶樹一座紫金獅帶一條金銀器皿共一萬兩太宗撫問再四六月太宗命韶

州刺史王子惟灝歸加王食邑五千戶實封三百戶
仍賜國信湯藥二金盒茶餅二十匱寶帶一條金器
一千兩銀裝器皿稱是又賜王子惟灝銀二百兩秋
八月王不康敕遣東頭供奉官高品尙醫李密并王
孫相繼而至又遣中使王首宿至賜王生辰禮物仍
令撫問王四上表讓國王敕遣給事中崔灝改封王
爲許王加食邑一萬戶實封二千戶仍改賜安時鎮
國崇文耀武宣德守道功臣

吳越備史補遺

九

遣子惟治表賀貢上金飾琉璃器皿五百事玉器二
十事水晶盤四事金二千兩銀二萬兩錦綺二萬疋
羊二百口法酒二百瓶以爲賀禮夏四月太宗命王
子惟治歸賜王御羅袍玉帶碼碯嵌珍珠酒器八對
又輟御前金燭臺一對以賜焉秋七月王不康太宗
聞之敕遣中使王守文翰林醫官王佑洎王諸孫駱
驛而至又敕遣供奉官詔加王食邑三萬戶實封五
千戶仍賜撫問及贖御藥一金盒八月疾稍痊遣子
團練使惟渲詣闕謝恩貢上黃犀帶一犬玉帶四金
飾酒器一千事黃絹草書八幅隸字四幅太宗撫問

再四是月敕遣皇城使李惠河州團練使王繼恩同
王子惟渲賜王生辰禮物國信至王扶疾拜命與來
使燕接極歡二十三日晡時王寢于齋之西軒命左
右讀唐書數篇命諸子孫誦調章詩什數篇未訖而
風恙復作四鼓而薨是夕大流星墜于正寢之上光
燭滿庭

王以天成四年八月二十四日四鼓而生復以端
拱元年八月二十四日四鼓而薨以生記薨實周
一甲子矣

卽日王繼恩先還京報訃太宗聞之哀悼不已詔廢

吳越備史補遺

辛

朝七日復敕王繼恩押入內班賈繼勳護喪歸于京
師冬十月二十四日王喪發南陽十一月二十三日
至京師太宗復發哀詔權窆于城東別墅卽日命有
司致祭翌日遣中使賁御筵一席致獻于王喪次前
二十五日太宗御文德殿命工部侍郎郭贄持節追
冊爲秦國王太常定諡曰忠懿二十八日復遣工部
侍郎郭贄致祭于喪次十二月十八日遣中使獻茶
湯于喪次

二年春正月丁酉日遣中使押翰林儀鸞鹵簿鼓吹
葬王于河南府洛陽縣賢相里陶公原命大臣以下

俱素服送三十里仍命有司撰碑文王任太師尙書
令兼中書令國王凡四十年爲元帥三十年窮極富
貴福履之盛近代無比王性儉素自奉尤薄常服大
帛之衣帷帳裊褥皆用紬絹紫纈食不重味稟性謙
和未嘗忤物在藩日每有朝廷使至接奉勤厚進貢
之物制作精妙將遣使必陳列于庭北面焚香再拜
而遣之初廢王嘗于山亭擊鼓聲聞於外守衛者遽
以聞王王曰吾兄以閒適爲懷非鼓樂不歡乃命裝
金魚水鼓四面奉之國人聞之感王孝友有涕出者
由是廢王無憂廢之恨終以疾卒太平興國中趙普

吳越備史補遺

三

再入相盧多遜罷爲兵部尙書一日普召王世子惟
濬至謂曰朝廷知盧多遜求取元帥財物極多今未
鞫劾者恐累元帥耳請具所遺之物列狀上之惟濬
歸白王王曰主上英明凡大臣有過卽自行何用狀
上惟濬懼普因與僚吏等再三堅請曰若不預言事
恐不測王曰且姑休矣我當取案籍考視之於是盡
取當時簿籍命火焚之卽召惟濬至謂曰我入朝之
初荷蒙主上殊常之遇故左右大臣咸有餽物非獨
盧相也豈可見人將溺而加石焉汝等少年慎勿爲
此禍福我自當之惟濬等惕懼而退普聞之召惟濬

至深自歎服稱王寬洪大度事遂寢王博覽經史手
不釋卷平生好吟咏在國中編三百餘篇目曰政本
國相元德昭翰林學士陶穀皆撰集序後文僖公搜
尋遺墜總集爲十卷恭撰後序行於世時天禧四年
文僖公忝機衡之命特詔尊王爲尙父王自國初供
奉之數無復文案今不得而書唯太祖太宗兩朝入
貢記之頗備謂之供奉錄今但取其大者如赭黃犀
帶龍鳳龜魚僊人鰲山寶樹等通犀帶凡七十餘條
皆希世之寶也玉帶二十四紫金獅子帶一條黃金
九萬五千餘兩銀一百一十萬二千餘兩綾羅錦綺

吳越備史補遺

三

二十八萬餘疋色絹七十九萬七千餘疋金飾玳瑁
器一千五百餘事水晶碼碯玉器凡四十餘事珊瑚
樹一高三尺五寸金銀飾酒器一十四萬餘事金銀
龍鳳船舫二百艘銀裝器械七十萬事白龍腦二百
餘觔王自入朝至歸國復入朝太祖太宗所賜金器
并金物六萬四千七百餘兩銀器四十萬八千八百
餘兩玉器皿一萬七千事寶玉帶四十二條錦綺羅
紈一十六萬六千三百餘疋御衣并袍襲衣等金盃
六頂金甲六副金玉鞍轡御馬一十六匹細馬四十
八匹駝三百餘匹散馬二千七百二十四金印四顆

玉册二御劔二口法酒三千餘瓶荷隆腰帶三千事
鳳冠四頂他物稱是

吳越備史補遺卷一 終

吳越備史補遺

三

鳳冠四頂他物稱是

玉册二御劔二口法酒三千餘瓶荷隆腰帶三千事

吳越備史雜考

吳越宗派考

備史五卷成于范林二掌記而補遺一卷則越中
比部德洪所纂也承前啟後後焉備矣第世系圖
中前乎武肅邈自旌德令而止後乎武肅迄于奉
議郎而止得母挂一而漏萬耶淵源遼邈支裔蔓
延不有信譜何以收族作宗派考

按我錢氏之先出于少典八世而至陸終終第三子
曰錢鏐者堯封之于彭城是爲商伯世本云彭祖也
吳越備史雜考

一

鏐第二十八子曰孚爲周錢府士士因去竹而稱錢
實受姓之始自孚而後凡二十四世曰林者自下邳
渡江爲烏程令因家吳之長興六世而至富春侯讓
乃江東第一代祖也又二十三世而至武肅王鏐乾
寧間誅宏弁昌盡有吳越之地三世五王享國百有
八年與五代相終始後忠懿王俶以地歸宋賜第于
汴總麻以上親凡二千餘人詔俱授官而佩印綬者
過半自是子孫八十餘年不徭展省于吳越而墳廟
荒蕪父老流涕殿中侍御趙抃是以有表忠觀之請
七世榮國公忱熙寧間始以使相來浙訪葺諸墳廟

後奉其母賢穆大長公主扈宋而南又賜第于台之
臨海縣榮國三子長秘書郎端仁其五世孫千一公
元孫分于蘇之常熟次少府端義其三世孫亞八公
璋分于姚之龍泉最少龍圖閣學端禮其五世孫朝
請公應孫分于越之會稽他若山陰之西中派則遜
王子易之所分也淳安清溪派則文穆三世孫隱之
所分也桐鄉派則弼文所分也長樂派則介所分也
金華派則遜所分也孟岸派則滋所分也長洲派則
元璋所分也松江派則良臣所分也常州派則卽之
所分也鎮江派則武肅五世孫伯一所分也洛陽派

吳越備史雜考

二

則蒙先所分也吉安派則侃所分也新喻新昌派則
冀國公孫怵所分也惟魏國公象祖爲閣學之孫其
子孫至今奕葉于台第如累朝諾敕金書鐵券種種
具存而吾常熟一支自千一而後又四世而爲元都
官昌宗其長子通九公鏞則分于鹿園仲子通十公
珍則分于奚浦自通十而迄于先太學公甸凡六世
至子兒達道孫生韓曾孫建元輩又凡十世去武肅
則二十有七世矣兩塘之間族指以億萬計冠蓋相
望譽髦如林庶幾視錢塘臨海而輝映焉猗與盛矣
原原本本夫孰非神明之胄耶爲作支派考附于備

史之後庶幾備其所未備成一家書云耳若夫諸子
姓爵秩名字則是有大宗譜慶系譜流光譜及各支
續譜在茲不復記

吳越國治考

國治在鳳凰山下乃唐以前州治也築城自秦望山
由夾城東亘江干薄錢塘湖霍山范浦凡七十里城
門凡十皆金鋪鐵葉用以禦侮曰朝天門在吳山下
今鎮海樓曰龍山門在六和塔西曰竹車門在望仙
橋東南曰新門在炭橋東曰南土門在薦橋門外曰
北土門在舊菜市門外曰鹽橋門在舊鹽橋西曰西

吳越備史雜考

三

關門在雷峰塔下曰北關門在夾城巷曰寶德門在
艮山門外無星橋蓋其時城垣南北展而東西縮唐
乾寧間楊行密將攻杭州攜僧袒肩密來瞰城袒肩
曰此腰鼓城也擊之終不可得又聞鼓角聲曰錢氏
子孫當貴盛未可圖也其營屯凡六曰白壁營在城
南上隅曰寶劍營在鍾公橋北曰青字營在鹽橋東
曰福州營在梅家橋東曰馬家營在修文坊內曰大
路營在褚家塘初王祖以强弩射潮築堤捍國而以
鐵幢識其射處以今驗之去鳳凰山僅二百步許此
足爲證

宋行宮卽錢王舊宮也皇城九里入和寧門左進奏院玉堂右中殿外庫至北宮門循廊左序巨瑞幕次列如魚貫祥曦殿朶殿接修廊爲後殿對以御酒庫御藥院慈元殿外庫內侍省內東門司大內都巡檢司御厨天章等閣廊回路轉乘班排列又轉內藏庫對軍器庫又轉便門垂拱殿五間十二架長六丈廣八丈四尺簷屋三間長廣各丈五朶殿四兩廊各二十間殿門三間內龍墀折檻殿後擁舍七間爲延和殿右便門通後殿殿左一殿隨時易名明堂郊祀曰

吳越備史雜考

四

端誠策士唱名曰集英宴對奉使曰崇德武舉及軍班授官曰講武東宮在麗正門內南宮門外本宮會議所之側入門垂楊夾道間以芙蓉環朱闌二里至外宮門節堂後爲財帛生料二庫環以官屬直舍轉外密子入內宮門廊右爲贊善春坊直舍左講堂七楹扁新益外爲講官直舍正殿向明左聖堂右祠堂後凝華殿瞻筮堂環以竹左寢室右齋安位內人直舍百二十楹左彝齋太子賜號也接繡香堂便門通繹己堂重簷複屋昔楊太后垂簾于此曰慈明殿前射圖竟百步環修廊右博雅樓十二間左轉數十步

雕闌花螿萬卉中出鞦韆對陽春亭清齋亭前芙蓉
後木樨玉質亭梅繞之由繹己堂過錦膳廊百八十
楹直通御前廊外卽後苑梅花千樹曰梅岡亭曰冰
花亭枕小西湖曰水月境界曰澄碧牡丹曰伊洛傳
芳芍藥曰冠芳山茶曰鶴丹桂曰天闕清香堂曰本
支百世佑聖祠曰慶和泗州曰慈濟鍾呂曰得真橋
曰洞庭佳味茅亭曰昭儉木香曰架雪竹曰賞靜松
亭曰天陵偃蓋以日本國松木爲翠寒堂不施丹雘
白如象齒環以古松碧琳堂近之一山崔嵬作觀堂
爲上焚香祝天之所理宗時吳知古掌焚修每三茅

吳越備史雜考

五

觀鐘鳴觀堂之鐘應之則駕輿山背芙蓉風帆沙鳥
咸出履鳥下山下一溪縈帶通小西湖亭曰清漣怪
石夾列獻瑰逞秀三山五湖洞穴深杳豁然平朗翬
飛翼拱凌虛樓對瑞慶殿損齋緝熙崇正殿之東爲
欽先孝思復古紫宸等殿木圍卽福寧殿射殿曰選
德坤靈殿貴妃昭儀婕妤等位宮人直舍螳聚焉東
過閣子庫睿思殿儀鸞修內八作翰林諸司是爲東
華門見西湖遊覽志蓋高宗南渡卽其地爲行宮是
以後人但知有宋故都而不知有錢氏耳

鐵券之制其形如瓦方廣約一尺五寸許蓋鎔鐵而成又鑲金其上者也唐昭宗乾寧四年八月遣使焦楚鎰賚券以賜彭城郡王鏐券文凡三百二十二字晶光閃爍天語溫純積而藏之家廟久矣宋太宗淳化元年杭州守臣以前券及竹冊玉冊各三副詔誥百餘函進呈詔賜還忠懿王嗣子惟濬收貯比仁宗登極霸州防禦使晦侍燕閒談及鐵券進呈錄本及先朝御書元豐四年特令朝奉大夫權知開封府事藻進呈鐵券仍降付本家永傳後裔宋末元兵破台城沈之渭水中者五十六年至順二年漁人獲而售

之宗子世珪家國朝洪武二年太祖大封功臣下禮官議鐵券制學士危素奏唐和陵時賜武肅鐵券見在上遣使卽家訪焉世珪子尚德捧詔券及五王遺像以進上御外朝與宣國公李善長等觀之賜宴中書省命鏤木爲式給還券像二十一年孫克邦以大臣薦赴闕吏部引見因以錢氏納土至今子孫尚存諭北方歸降者已見東宮殿下亦問到今幾代除授江西建昌府知府二十三年卒于官都察院查勘任內稅糧抄劄到京子汝賢供係吳越王嫡派有鐵券爲照本院官引見蒙聖旨著孩子靠前來遂于奉天

殿丹陛前欽奉玉音云五代時天下大亂各據偏方爾祖能使兩浙之民不識兵革到宋朝來知道宋太祖是箇真主便將土地歸附券與你保守田產家財都給還一時縉紳士夫爭爲詩文贈送歸台州卽今藏于宗子鳳墀家雖券字稍有剝落而千年故物世守勿墜云

鐵箭考

始祖武肅王以梁開平四年八月築捍海塘怒潮急湍晝夜衝激版築不就表告于天云願退一兩月之怒濤以建數百年之厚業禱胥山祠云願息忠憤之

吳越備史雜考

七

氣暫收洶湧之潮函詩一章置海門云傳語龍王并水府錢塘借與築錢城因採山陽之竹令矢人造爲箭三千隻羽以鴻鷺之羽飾以丹珠鍊剛火之鐵爲簇旣成用葦敷地分箭六處管用東方青九十丈南方赤三十丈西方白七十丈北方黑五十丈中央黃二十丈鹿脯煎餅時果清酒棗脯茅香淨水各六分香燈布置以丙夜三更子時屬丁日上酒三行禱云六丁神君玉女陰神從官兵六千萬人鏐以此丹羽之矢射蛟滅怪渴海枯淵干精百鬼勿使妄干惟願神君佐我助我令我功行早就禱訖明日募強弩五

百人以射濤頭人用六矢每潮一至射以一矢射止
五矢潮乃退錢塘東趨西陵餘箭埋于候潮通江門
浦濱鎮以鐵幢誓云鐵壞此箭出又以大竹破之爲
籠長數十丈中實巨石取羅山大木長數丈植之橫
爲塘依匠人爲防之制又以木立于水際去岸二九
尺立九木作六重象易旣未濟卦由是潮不能攻沙
土漸積塘岸益固

鐵幢考

按舊臨安志郡人相傳吳越王用强弩射潮箭所止
處立鐵幢識之又云錢氏子孫言築塘時高下置鐵

吳越備史雜考

八

幢三以爲水則今在利津橋北者其一也幢制首圓
如杵徑七八寸許出土約三尺餘其趾入土不知幾
許故老又云初置幢時塘猶未成慮潮盪幢用鐵輪
護幢趾而以鐵絙貫幢榦且引絙維于塘上下之石
鍵然後實土築塘故首出上云此說是也宋淳祐間
趙安撫買民地作亭覆幢今亭夷爲民居獨存窪地
而鐵幢之首嶄然出池中可驗幢本有三故老云一
在舊便民街東南小巷今其巷名尙鐵箭一在舊薦
橋門外皆堙塞于民居僅存其在利津橋者又爲民
居所蔽若不表識久亦堙塞此實幢也近世有賦鐵

箭者遂指此幢爲箭認幢首爲鏃首不思方射潮時
箭已逐潮去矣惡能久存且王雖英雄其所發箭亦
不過致一時之精誠未必異于常箭不考而妄作如
此可笑又謂其首出土面面可撼而不可拔以爲神
異此不察其下有關鍵故也至惑于夷堅志之說謂
此矢拔則龜目紅其言尤謬作是考以辨之

吳越備史雜考

九

此夫楚眼龜目珠其言大謬特最妄也按云

異此不察其不昏關鑿始出至惡于更聖而文秀

也百矣又謂其首出土面面可撼而不可拔以爲神

不誠疑一類之辭始末是王常備不意而妄作也

箭已逐潮去矣惡能久存且王雖英雄其所發箭亦

不過致一時之精誠未必異于常箭不考而妄作如

吳越備史後序

備史者備五代之史也歐陽氏曾作五代史矣何以備爲曰歐陽氏之史非信史也曷言乎非信史也當是時藩鎮僭亂西川王氏稱蜀邛溝楊氏稱吳南海劉氏稱漢長溪王氏稱閩皆竊大號帝制自爲我武肅王獨處吳越之邦臣事中國永奉年號其諸國或通姻親或達聘好皆以龍衣玉冊暨書疏等勸王自大王笑曰此欲駕吾于鑪炭上耶吾以去僞平賊承天子疇庸之命至于封建車服之制悉有所由豈圖一時之利乃同爾輩所爲耶卻之不納其守節也如

吳越備史後序

一

此歐陽氏乃欲以求玉冊改年號二事損王盛德可謂信乎歐陽氏之言曰唐莊宗入洛鏐遣使貢獻求玉冊莊宗下其議于有司羣臣皆謂非天子不得用玉冊郭崇韜尤爲不可旣而許之乃賜鏐玉冊金印鏐因以鎮海等軍節度授其子元瓘自稱吳越國王肅潤考同光元年我武肅王獲傳國璽不敢僭有急獻之於朝三年秋八月敕遣大臣李德休聶璵等持節備禮賜黃金印玉冊時有司有備竹冊銅印者唐主曰尙父元老不當待以人臣况已封建乎玉冊之賜實莊宗意也非王求也使王果有僭天子之禮之

心何不收玉璽以自侈顧乃納國璽以求玉册耶求玉册大事也苟有是求則求玉册之使何得不書某姓名乃僅曰遣使貢獻耶且賜册之日直封吳越國王又授其四子爲節度文穆王仍以太師兼中書令領西浙何又曰以鎮海等軍節度授子某而自稱吳越國王耶此其不可信者一也歐陽氏又有言曰五代十國稱帝改元者七吳越荆楚常行中國年號然余聞於故老謂吳越亦嘗稱帝改元而求其事迹不可得頗疑吳越後自諱之及旁采閩楚南漢諸國之書與吳越往來者多矣皆無稱帝之事獨得其封落

吳越備史後序

二

星石爲寶石山制書稱寶正六年辛卯則知其嘗改元矣辛卯長興二年乃鏐之末世也肅澗又攷辛卯長興二年安重誨甫誅我王致仕方起位亦初復何得遽有封石之事且此石不知落于何地封于何所制書何不傳於世而獨爲歐陽氏所得邪夫欲求其事迹不得采諸國往來之書又不得而強以落星石爲寶石且因寶石之名懸擬寶正年號以是摭而實之然邪否邪此其不可信者二也至于曰重斂曰殘刑曰掠商賈寶貨其言固盡反我王之所爲具不足辨大要欲以一己之私見掩百世之公議其爲非信

史也明矣今觀備史一書約而達簡而該自武肅以迄忠懿三世五王八十餘年無鉅不書無微不錄無溢說無諛詞其言皆實而有據顯而可徵不誠煌煌乎五代信史哉謂之備史宜也舊本武肅王分二卷文穆王一卷忠獻王一卷忠遜王附之大元帥吳越國王一卷補遺一卷今但以武肅王二卷合爲一卷餘悉遵舊不敢同異作備史者誰武勝軍節度使書記范公坳巡官林公禹也肅潤再攷文穆王第十四子儼者宋開寶三年以吳越備史十二卷上忠懿王王嘉歎錫賚殊厚其平生著述有吳越備史十五卷備史遺事五卷其書湮沒不傳卷帙與此本亦不類今姑闕焉不載其名

吳越備史後序 三

吳越公國吳越第二十六世孫肅潤百拜謹撰十四
卷之卷賦後一卷今時以肅王二卷合徵一卷
平正外計史楚語之備史宜也舊本危微王卷二卷
益符無婚歸其有皆實而奇懸顯所不始不始錄
史也明矣今觀備史一書約而達簡而該自武肅以

吳越備史後序

吾祖武肅王國於吳越傳文穆忠獻忠懿忠遜凡五
王宋書記范公坰巡官林公禹撰備史記其顛末較
正史特核而詳云夫以武肅之誅亂討暴嗣王之保
境安民卒能封府庫籍郡縣以歸命真主此其豐功
盛德所以銘彝鼎而著旂常者及於一時而傳於萬
世聞者莫不樂道之而况爲其子孫者乎間攷歐陽
氏五代史於吾祖不無異論家礎日旣嘗辨之及讀
蘇文忠奉敕所作表忠觀碑其言獨與備史所載略
同且云其有功于朝廷甚大有德於斯民甚厚此誠

吳越備史後序

四

千古公論哉而余小子竊猶惓惓於是書者蓋以數
百年來鑄版僅存雖裔孫某某累加攷訂而不能印
布以廣爲流傳則五王之功德將遂泯沒而仁人孝
子其不戚戚于心者幾希故不揣茫昧於刷印後敬
書數語附於卷末亦欲以廣示宗人母致廢墜非敢
夸大其辭以與從來有國家者之內外史竝絜長較
短也

短也
王宋書
吳越二十
九世孫道
生百拜謹
書
未
盡
所
願
知
肅
王
國
欽
吳
越
文
獻
忠
獻
忠
懿
忠
遜
凡
五
王

文獻通考吳越備史九卷陳氏曰吳越掌書記范垞
巡官林禹撰案中興書目其初十二卷盡開寶三年
後又增三卷至雍熙四年今書止石晉開運比初又
闕三卷只九卷

又吳越備史遺事五卷陳氏曰全州觀察使錢儼撰
儼之弟也其序云備史亦其所作託名林范而遺名
隆迹殊聞異見闕漏未盡者復爲是編時皇宋平南
海之二年吳興西齋序蓋開寶五年也儼以三年刺
湖州

宋史傳儼字誠允儼之弟儼襲封命爲鎮東軍安撫

吳越備史跋

一

副使周顯德四年奏署衢州刺史太祖開寶三年知
湖州充宣德軍安撫使太平興國二年授新媯儒等
州觀察使仍知湖州入朝命爲隨州觀察使尋換金
州未幾出判和州咸平六年卒所著有前集五十卷
後集二十四卷吳越備史十五卷備史遺事五卷忠
懿勳業志三卷貴溪叟自敘一卷

案此編正卷四補遺一爲卷凡五卷帙似與通考後
一條合而實非也今以前一條所記之年考之此編
第三卷已盡石晉開運四年依陳氏當止此今第四
卷盡開寶元年陳氏所云闕者已全豈散佚後復得

耶抑後人增補耶陳氏云又增三卷至雍熙四年今補遺一卷終俶之世考宋史俶卒於真宗端拱元年卽雍熙四年之明年陳氏志其闕今并仍其舊矣今觀補遺卷首原稱後人增補因前補者既闕而後人重補之第采本傳與家傳以足成此書耳至第四卷末有錢中孚錄寫題名錢渙又署跋尾洵爲儼所撰原本古今卷帙或有歸併第十二卷不應簡略如是當求儼原序考訂也康熙乙未夏五月雨窗乘暇考訂因記繡谷亭主

偶客禾興得吳越二十四孫受徵刊本與此本校對

吳越備史跋

二

訛字都爲改正第刊本中小傳頗多刪節缺略其後序題萬厯庚子此本前有馬蓋臣論亦屬明嘉靖間定本至萬厯時不知何以又有刪削此抄本爲當時林范原撰本亦尙未可定也據受徵刊本武肅王二卷文穆王忠獻王吳越國王各一卷凡五卷吳越補遺一卷云是越中比部德洪所纂則前有錢中孚跋尾者原是五卷此抄本標題誤也卷帙雖合稽之陳氏之論究難定此本爲林范原本乙未六月十有九日繡谷亭主再記

吳越備史四卷補遺一卷明嘉靖間武肅十九世孫德洪舊刊卷首有輿地圖世系圖十三州考馬蓋臣爲記四卷之末有宋嘉祐元年四代孫錢中孚紹興二年七代孫錢渙二跋補遺前有小序謂舊本止於戊辰此卷不知作自何人蓋參本傳及家王故事爲之卷末有二十六世孫肅潤二十九世孫道生二序是此書係德洪所刊而肅潤道生復重訂者也

四庫所收之本提要云圖表俱佚今卷首輿地圖卽十三州圖世系圖卽諸王子弟官爵封諡表惟建醮迎釋迦事未載似又一本矣中興書目有前十二卷

吳越備史跋

三

後增三卷書錄解題謂開運前缺三卷自宋季以來書已闕佚而卷目撰人名氏亦多異同今考核無從就是本脫訛處據通鑑備要十國春秋重加訂正而刻之十國春秋言錢儼著吳越備史遺事忠懿勳業志錢氏戊申英政錄若干卷則謂是書錢儼著而託名林范者亦非無據也嘉慶甲子嘉平旣望虞山張海鵬識

歐陽文忠公全集卷之末有宋嘉祐元年四月外添錄

07187

益稷書世卷首有輿地圖世系圖十三州

吳越備史四卷補遺一卷明嘉靖間武肅



